

ASO LUA, 18 IANUARI 2022

Na tauaofia le Fono Aoaofaitulafono i le itula e 9:25 i le taeao e tusa ai ma Polokalame o Fonotaga a le Palemene 2022/2023.

Tatalo.

FOFOGA FETALAI: Ou te faasilasila atu ua toe amatalia nei Taulumaga a le Fono Aoaofaitulafono.

SAUNOAGA O MALIU

Na faasilasila e le Fofoga Fetalai le tuumalo o nisi o tamalii sa avea ma sui usufono o le Palemene i tausaga ua mavae.

1. Afioga TAPULESATELE Mauteni Tamasona Metuli II Esera, i le aso 8 Tesema 2021.

O le Afioga ia TAPULESATELE Mauteni Tamasona Metuli II Esera, sa avea ma Sui Usufono o le Palemene mo le Itumalo Faaalaalafaga o Vaisigano Nu.2, i le Paeaiga Lona XVI mai le tausaga 2016 seia oo mai i le tausaga 2021.

Sa avea o ia ma Sui Usufono o le Komiti o le Vaega Tau le Tamaoaiga ma le Komiti o le Vaega o Atinae Eseeese.

2. Afioga Hon MAFASOLIA VAAI Papu Vaelupe. Tuumalo i le aso 17 Ianuari 2022 i Aukilani i Niu Sila. Sa avea ma Sui Usufono o le Palemene mo le Itumalo Faaalaalafaga o Falealupo i le Paeaiga Lona XII, mai le tausaga 1996 i le tausaga 2001, o se Sui o le Vaega Faaupufai e Puipuia Aia Tatau a Tagata po o le HRPP.

Sa avea o ia ma Minisita o Faamasinoga mai le tausaga e 1996 – 1998, ma toe tofia mo le tofi Minisita o Faatoaga mai le tausaga e 1998 – 2001.

O le Paeaiiga Lona XIII mai le tausaga e 2001 i le tausaga 2006, na filifilia mai ai le Afioga Hon. Vaai Papu Vaelupe ma avea ai o ia ma Sui Usufono o le Palemene mo le Itumalo Faaalaalafaga o Vaisigano Nu.1 Sui Usufono Tutoatasi.

I lena Paeaiiga, sa avea ai o ia ma Sui Usufono o le Komiti o Galuega a le Maota, Komiti o Tupe Maua ma Tupe Totogi, Komiti o Mataupu Tau Faiga Palota, Komiti o Tulaga Aloaia ma Amio Tauloa, ma le Komiti o Faalapotopotoga ma Iuni faa-Palemene.

E avea ai lenei avanoa e fai ai a'u ma Sui o le Palemene e molimoli atu ai faamafanafanaga ma faamaisega i Itumalo pele, Faletua ma Nofo-aalo aemaise o aiga ona o e sa pelē, ua toesea ona o le valaau a le maliu ma le oti.

O le mea lea ou te valaau atu ai ma le agaga maualalo i le mamalu o le Palemene, ina ia tatou tutulai faatasi ma le filemu mo se minute e tasi, e faailoa ai lo tatou faaaloalo i Sui Usufono ua fai i lagi le folauga.

Na tutulai filemu le Maota mo le minute e tasi a o saunia e le Fofoga Fetalai se tatalo e faaalua ai lo latou faaaloalo i sui usufono ua tuumalo.

TUUNA ATU O PEPA

Na tolaulauina e le Failautusi i le Fono Aoa le faasologa o Pepa e tusa ai ma T.T.49(2).

1. P.P.2021/2022 Nu.15, Lipoti Faaletausaga a le Pulega o Faailoga ma Tusipasi Tauloa a Samoa, mo le Tausaga Faaletupe 2020/2021.
2. P.P.2021/2022 Nu.16, Lipoti Faaletausaga a le Matagaluega o Faatoaga ma Faiga Faiva, mo le Tausaga Faaletupe 2020/2021.
3. P.P.2021/2022 Nu.17, Lipoti Faaletausaga a le Faaputugatupe mo le Lumanai Manuia o Tagata Samoa 2020/2021.
4. P.P.2021/2022 Nu.18, Lipoti Faaletausaga a le Faalapotopotoga o Suesuega Faasaienisi a Samoa, mo le Tausaga Faaletupe 2020/2021.
5. P.P.2021/2022 Nu.19, Lipoti Faaletausaga a le Ofisa Tausi Mavaega, mo le Tausaga Faaletupe 2020/2021.
6. P.P.2021/2022 Nu.20, Lipoti Faaletausaga a le Faalapotopotoga o Esetete Tausi a Samoa, mo le Tausaga Faaletupe 2019/2020.
7. P.P.2021/2022 Nu.21, Lipoti Faaletausaga a le Komisi o Galuega a le Malo mo le Tausaga Faaletupe 2020/2021.
8. P.P.2021/2022 Nu.22, Lipoti Faaletausaga a le Pulega o Tupe Faava o Malo a Samoa, mo le Tausaga Faaletupe 2020/2021.

9. P.P.2021/2022 Nu.23, Lipoti Faaletausaga a le Ofisa o le Loia Sili, mo le Tausaga Faaletupe 2019/2020.
10. P.P.2021/2022 Nu.24, Lipoti Faaletausaga a le Faletupe Tutotonu o Samoa, mo le Tausaga Faaletupe 2020/2021.
11. P.P.2021/2022 Nu.26, Lipoti Faaletausaga a le Pulega o Uafu ma Taulaga, mo le Tausaga Faaletupe e faaiuina aso 30 Iuni 2021.
12. P.P.2021/2022 Nu.27, Lipoti Faaletausaga a le Faalapotopotoga o Mea Tau Fale a Samoa, mo le Tausaga Faaletupe 2020/2021.
13. P.P.2021/2022 Nu.28, Lipoti Faaletausaga a le Faalapotopotoga o Elele Tumaoti a Samoa, mo le Tausaga Faaletupe 2020/2021.

TUUNA ATU O LIPOTI A KOMITI FAA-PALEMENE

Na tolaulauina e le Failautusi le faasologa o Lipoti a Komiti Faa-Palemene e tusa ai ma T.T.52(5).

1. P.P.2021/2022 Nu.25, Lipoti a le Komiti o Tupe Maua ma Tupe Totogi i le Tala Faatatau o Tupe Faaopoopo (Nu.1) 2021/2022.

SAUNOAGA FAAFEILOAI A LE FOFOGA FETALAI

FOFOGA FETALAI: O le a avea ia lenei avanoa e faatalofa atu ai i le paia maualuga o le Palemene i le tatou toe tauaofia ai mo le faaauauina o galuega fuafuaina o lenei tausaga fou 2022.

I le afio o lau Afioga i le Tamaitai Palemia, afio o lau Afioga i le Sui Palemia, afifio a outou Afioga i Minisita o le Kapeneta, faapea foi a outou afioga i Minisita Lagolago.

Tainane lea Itu o le Maota i le afio o lau Afioga i le Sui Taitai, aemaise le afifio o sui usufono mamalu uma o le Palemene. O le viiga e foi pea i le Atua ona o lana tausiga alofa i lo outou soifua ma so matou ola ua mafai ai ona tatou toe fesilafai i le manuia. Malo le folau, malo le tauatai, malo le soifua manuia ma le lagi e mama, manuia le tausaga fou.

E fia faatalofa atu foi i le faafogafoga tapuai mai a si o tatou atunuu pele i ona paia ma mamalu apoapogata, i Lana Afioga Mamalu i Le Ao o le Malo ma le Masiofo, le Sui o le Fono a Sui Tofia ma le Faletua, le Faamasino Sili ma le mamalu o le itutino o le Faamasinoga.

Le paia i Aiga ma Tama, Tama ma Aiga, le Usoga a Tumua ma Pule, Ituau ma Alataua, Aiga i le Tai ma le Vaa o Fonoti. Le Nofo a faaluuluga a Ekalesia Kerisiano uma i Samoa ma le afaigaluega paia a le Atua o lo o talafaaauto i so o se fatafaitaulaga i afioaga ma alaafafaga o le atunuu.

E faatalofa ma ofo alofa atu lau Palemene i lenei taeao fou i lo outou soifua manuia ma le lagi e mama, malo le faatoatoa malo le onosai. E faamanuia

atu foi i le tausaga fou. Ua faamalo tatalo, faafetai tapuai, o lea ua toe tauaofia lau Palemene i le manuia ona o la outou faanonogamanu. Ia tapuai maia ma le manuia.

E faatalofa atu foi i le saofaiga a Ofisa Sili o Pulega o Matagaluega ma Faalapotopotoga Tumaoti a le Malo, ua tatou toe mafuta i lenei taeao ona o la outou foi pitolaau e lagolago ai so o se tualumaga a le Palemene. Malo le lavapapale, malo le onosai, faafetai tautua atunuu. E faamanuia atu foi le tausaga fou.

O Samoa uma o lo o faafofoga tapuai mai i so o se tafa o le lalolagi, e faatalofa atu lau Palemene i lenei taeao fou, manuia le tausaga fou. E i ai le manatu maua, o lo o agalelei pea le Atua i lo outou aumau ai i na atunuu ona o sailiga manuia aua aiga ma si o tatou atunuu. Ia alofagia e le Atua ia i ai pea lana faamalologa ia te outou ina ia tapuaaoina ai lo outou soifua ma malupuipuaia mai outou ma nai a outou fanau mai le faamai oti o lo o pesia ai atunuu o lo o outou afifio ma papaa ai.

E le faagaloina foi nai o tatou uso i Sasae, i lau Afioga i le Kovana Sili ma lou faletua, afio le Lutena Kovana ma le Kapeneta, afio le Peresetene ma le mamalu o le Maota maua, lau Afioga i le Fofoga Fetalai ma le Maota o Sui, le Faamasino Sili ma le Vasega o Faamasino. O paia aua Sua ma le Vaifanua, Fofu ma Aitulagi, Ituau ma Saole, le Launiu Saelua ma le nofo a Maopu, ma upu i le Falesefulu.

O paia ia ua atoatagi i le Maota nei, a o mamalu foi o lo o nofo tatalo ma tapuaia o tatou faiva. Na o le Atua e lelei ai mea uma e pei o le upu o le pese a le EFKS. Ia faatumu mai le lagi la outou tofa ma le utaga fetalai, aua lo tatou valaauina o Taitai o Samoa.

O toe upu a le Nofoa, ia sagai ane ai o le tai, manuia le usugafono a lau Afioga i le Tamaitai Palemia ma lau Kapeneta, faapea Minisita Lagolago, manuia foi le usugafono a lau Afioga i le Sui Taitai ma lea Itu o le Maota, aemaise sui usufono uma o le Palemene. Ia manuia le tapuaiga a Samoa i ona tulaga faalupe.

ISI FAASILASILAGA A LE FOFOGA FETALAI

FOFOGA FETALAI: E ao ona ou faamanino mo le silafia e lenei Maota, se faafitauli ogaoga ua tulai mai i le faatinoga o le faagasologa o le tuu faatasia o Tulafono e pasia e le Fono Aoao Faitulafono mo le tuuina i ai o le maliega a le Ao o le Malo. O nei faafitauli, na molimauina i le faagasologa o le faaofiina o nisi o teuteuga o le Tulafono o Teuteuga o le Faavae 2020 ma le Tulafono o Fanua ma Suafa 2020 i le masina o Ianuari 2021.

E tusa o suesuega na faatinoina, faatoa maua lea faaletonu ina ua faailoa mai e le Loia Sili se eseese o aiaiga i totonu o Tulafono na tuuina i ai le

maliega a le Ao o le Malo ma le tulaga sao sa tatau ona i ai. Ua taoto aiaiga mo le faatinoga o le galuega, peitai, o le faatinoga sa faataunuina ai ua le tusa lea ma ala o le Tulafono. O le mea moni, ua fesetai kopi na faatinoina ai lea galuega ma kopi moni o ia Tulafono na tuuina i ai le maliega a le Ao o le Malo. Ua faamaonia foi le eseese o kopi o Tulafono o lo o faatau atu i le atunuu ma le kopi o lo o i luga o le upega tafailagi a le Palemene, faapea le kopi o lo o faaaogaina e le Ofisa o le Loia Sili.

O le popolega o le Nofoa, ona e ono afaina ai le faatautaiga o galuega a le Faamasinoga, ae faapea foi le nofo silafia e le atunuu lautele o le taatiaga sao o a tatou Tulafono. Ua mautinoa foi se tulaga le mautonu o le atunuu po o fea le lomiga sao o ia Tulafono.

O le masina o Tesema 2021 na faatoa oo mai ai lenei mataupu i le Ofisa o le Fofoga Fetalai, na taumafai ai loa e saili po o fea o taoto ai le sao ma le tonu o le faafitauli, ma faatonuina ai loa le Failautusi ina ia faatino se suesuega mo le faamaninoina o le afuaga o lenei faafitauli.

Ua maea ona faatino le suesuega e le Ofisa o le Failautusi o le Fono Aoao Faitulafono, ma ua ou taulimaina foi le lipoti. E i ai le talitonuga o le Nofoa, e le tatau ona taatia umi pe taoto ai faaleiloga lenei faafitauli, ona o Tulafono e fesootai ma mataupu e i ai le talitonuga o lo o tagofia e le Faamasinoga. E le gata i lea, a o mataupu faale-Faamasinoga a le atunuu lautele o lo o feagai ma i latou i le taimi nei. O se faafitauli e patino lava i le Palemene lona toe poupouina. Na o le Palemene foi e mafai ona ia toe faamautu ma faatulaga mo le sagatonu ai o le faatautaiga o le pitolaau a le Faamasinoga mo le amiotonu ma le faamaoni o faaiuga i mataupu a le atunuu o lo o faatoai atu i le Faamasinoga.

E talu ai o aiaiga o le faagasologa o le tatou galuega, e le mafai ai ona tatou sopoloa i aiaiga o tatou Tulafono Tumau, ae ua ou vave faailoa ona o se mataupu e ao ona faamanino i le faafofoga tapuai mai a le atunuu. O le taimi muamua lea ua tulai mai ai se faaletonu faapea ma ua faia le faaiuga a le Nofoa e tusa o faiga masani, e tatau ona faataatia le Lipoti o lea suesuega mo le silafia e le Maota.

E tusa ai ma Tulafono Tumau 139, e ao ona faamuamua le Tulafono Tau Faaofi o le Faatatauina o Tupe i lo nisi lava galuega a le Maota seia vagana ua maea. Tatou te usitaia lava a tatou Tulafono Tumau. Pe a maea ona tatou tagofia le Tala Faaopopo o le Tupe o le a lauliliuina ona faatulaga loa lea o lenei galuega mo Galuega o le Aso i le amataga o le isi aso Fono e sosoo ai. E le talia foi e le Nofoa ona afea se saunoaga i lenei mataupu. O le a ou toe faapea atu; e le talia e le Nofoa ona afea i se saunoaga lenei mataupu, ae o le a maua i luma avanoa pe a o o i ai le faasologa o le tatou galuega.

O le mea lea ou te tapa lau Afioga i le Sui Fofoga Fetalai.

FAATAATIAINA O LE LIPOTI O SUESUEGA A LE OFISA O LE FAILAUTUSI O LE FONO AOA O FAITULAFONO I LE MATAUPU NA LAGA E LE LOIA SILI E UIGA I TEUTEUGA O LE FAAVAE 2020 MA LE TULAFONO O FANUA MA SUAFA 2020

FOFOGA FETALAI: Ou te tapa lau Afioga i le Sui Fofoga Fetalai.

Afioga AUUAPAAU MULIPOLA ALOITAFUA MULIPOLA (Sui Fofoga Fetalai): Lau afioga i le Fofoga Fetalai, *Ou te faataatia i luga o le Laulau-a-Fono le Lipoti o Suesuega a le Ofisa o le Failautusi o le Fono Aoa o Faitulafono e faatatau i le mataupu na laga e le Loia Sili e uiga i Teuteuga o le Faavae 2020 ma le Tulafono o Fanua ma Suafa 2020.*

LAFO A LE KOMISI FAA-PALEMENE

FOFOGA FETALAI: Tulai mai lau Afioga i le Sui Taitaifono o le Komisi, lau Afioga i le Sui Fofoga Fetalai.

Afioga AUUAPAAU MULIPOLA ALOITAFUA MULIPOLA: Lau Afioga i le Fofoga Fetalai ou te faatu le lafo, *Ina ia faamaonia e lenei Fono Aoa le Polokalame o Fonotaga mo le Tauaofiaga 2022/2023 ua tuuina atu iinei e pei ona fautuaina e le Komisi Faa-Palemene.*

<i>Masina</i>	<i>Aso</i>	<i>Masina</i>	<i>Aso</i>	<i>Masina</i>	<i>Aso</i>
<i>Ianuari</i>	<i>18</i>	<i>Me</i>	<i>31</i>	<i>Oketopa</i>	<i>18</i>
<i>Fepuari</i>	<i>15</i>	<i>Iuni</i>	<i>21</i>	<i>Tesema</i>	<i>20</i>
<i>Mati</i>	<i>29</i>	<i>Aokuso</i>	<i>23</i>	<i>Ianuari 2023</i>	<i>17</i>

Lau Afioga i le Fofoga Fetalai, o le lafo lea ma le faaloalo.

Faaluaina e le Palemia ma le Minisita mo Faatoaga ma Faigafaiva.

Na faamaonia le lafo.

**TULAFONO TAU FAAOFI O LE FAATATAUINA O TUPE
FAAOPOPO (NU.1) 2021/2022
– felafolafoaiga i luga o le faitauga faalua**

FOFOGA FETALAI: E tusa ai ma Tulafono Tumau o le a faagasolo nei loa felafolafoaiga i luga o le faitauga faalua o le Tulafono Tau Faaofi o le Faatatauina o Tupe Faaopopo (Nu.1) 2021/2022.

O le avanoa leni o sui usufono e sausaunoa ai i Tulaga tau Tupe ma le Tamaoaiga o Samoa faapea foi Faiga Faavae tau Tupe a lo tatou Malo.

Ou te faamanatu atu foi i sui usufono ae le i sausaunoa, e le mafai lava ona tautalagia i le taimi nei Mea Taitasi o le Tulafono Tau Faaofi. E faatoa maua lava tatou avanoa i Mea Taitasi o le Tulafono Tau Faaofi pe a oo i le taimi o le iloiloga auiliili, pe a maea felafolafoaiga i luga o le faitauga faalua.

Ia, a o le avanoa leni e saunoa faalauaitetele ai aua le tamaoaiga o le atunuu ma faiga faavae tau tupe. O le mea lea, ia, o le avanoa leni ua tuuina atu mo so o se sui usufono e fia saunoa.

Ia, o lea ua matau atu o lea ua tulai mai le sui usufono mamalu mai Aleipata Itupa i Lalo. Ia, lou avanoa leni lau Afioga i le sui usufono mamalu.

SAUNOAGA FAA-TAUPOU

Afioga FALEOMAVEGA TITIMAEA TAFUA (Aleipata Itupa i Lalo): Malo faafetai mo le avanoa lau Afioga i le Fofoga Fetalai, se i ta tamua ai foi le Matamatagi i le amatalia o le tatou lauga.

Ia e muai ta le tavai na too ma sula le too na tula, pei o le seuga na ifoifo a alo o le Tuiaana. O mamalu faaifogata ma paia faaufisisili nuunuu faamaene o tai loloto. O augatalui tafa o le taua, na tuafega foi au o le tautiaga a o lea ua i fale le matega. Na fai mai foi e mamafa le toto i le vai, a o lea e sao e mamafa le toto i le vai. E leitioa foi a faasa ona fusi o le gutu o le povi pe a solisoli le saito. A lutia i Puava ona mapu lea i Fagalele, ae talanoa i tolotolo o Malololelei. A fai na na matala ia Segala le Papaigalagala, e tatau foi ona tatala i le alofa lau faautautaga.

Ieova e, e malie ia te oe upu a lou gutu ma mafaufauga o lou loto. E faasaga ae ou mata i mauga e oo mai ai lou fesoasoani, o lo'u fesoasoani foi e mai lou alii lea.

O lea ua ifo le taulaumea, ua toa foi le tai, le tuai'a maualuluga le sau o le taeao. O lea ua malumaunu le fogatia o le tiaseu o alii, ina ua faaifo i tuamafafilimalae, ua gogo foi le siu o Amoa ae tafamanino le laulai, e faafeiloai le matagofie o ulufanua ma atululuga o le paia o le Maota i Tiafau. O le malae o le faautugatagi a Tumua ma Pule.

E faafetai i lau afioga i le Fofoga Fetalai mo le avanoa, e fai ai se sao o lenei itumalo o Aleipata Itupa i Lalo, i le Tala Faaopoopo o le Tupe, 2021/2022.

A o le i amatalia se upu, e faatalofa atu i le paia o le Tafatolu fefaatauagai o le tatou Malo. I le afio o lau Afioga i le Ao Mamalu o le Malo ma lau masiofo. Susu o lau susuga i le Sui o le Fono o sui Tofia ma lou faletua. Lau Afioga i le tamaitai Palemia muamua o Samoa ma le Pasefika atoa. Le paia ma le mamalu, o alii ma tamaitai Minisita o le Kapeneta, afioga i Minisita Lagolago, lau afioga i le Taitai ma le Sui Taitai o le Itu Agai, ma le Vaega Faaupufai e Puipuia Aiatatau a tagata.

Le afio o lau afioga i le Faamasino Sili, lau afioga i le Peresetene, Alii ma Tamaitai Faamasino o le Faamasinoga.

Lau Afioga i le Fofoga Fetalai o le Maota, le paia ma le mamalu o le Palemene o Samoa.

E le faagaloina foi le tapuaiga a sui o Malo mai fafo o lo o i Samoa nei, Ofisa Sili o Pulega o Matagaluega ma Faalapotopotoga Tumaoti a lo tatou Malo ua tatou mafuta i lenei aso.

Lau tapuaiga Samoa, le paia o Aiga ma latou Tama, o Tama foi ma o latou Aiga, le usoga a Tumua ma Pule, Ituau ma Alataua, Aiga i le Tai ma le Vaa o Fonoti.

E le faagaloina foi le tapuaiga a le Motu i Sasae, le afio o le Kovana Sili ma lou faletua, le Kovana Lutena, afio lau afioga i le Peresetene o le Senate. Lau afioga i le Fofoga Fetalai o le Faigamalo a Tutuila ma Manua. O le paia lava lea i le susu o Sua ma le Vaifanua, Fofa ma Aitulagi, Saole ma Saleaamua ma le Launiu na Saelua, Faatuiolemotu ma tootoo o le Faleula, ma upu ia te oe le Manuatele.

Le paia o aiga Sa Levi, susu taitai o ekalesia e fia. Le paia o le aufaigaluega tofofi a le Atua i so o se fatafaitaulaga, o lo o faanonomanu aua se manuia o Samoa mo a taeao. Fai mai o le meafaigaluega, e mani le lau ae pulu lona au.

Se i fai se tala i le tapuaiga a si ou itumalo. Le afio o lau afioga i le Tuiatua Faanofonofa, afifio alalaimalae, afio le alii o le itu ma le tane o le itu, pule ma taitai i Lalovi ma Malaefono, ma le mamalu ia te oe Saleaamua. O paia na ma mamalu o si ou itumalo o Aleipata o le fale i lalo. E amata mai Satitua, Malaela, Lotopue, Mutiatele, Saleaamua, Utufaalalafa, Samusu, Amaile ma Tiavea.

E le faagaloina foi le tapuaiga a le aufaigaluega a si ou itumalo. Lau Susuga i le Toeaina Pati ma Matalena Vili EFKS. Lau susuga i le toeaina ekalesia Faapotopotoga a le Atua i Lotopue, Malo ma Mitaina Sefo. Le afio o lau Afioga i le Peresetene, susu lau susuga i le Peresetene o le Auuso. Lau Susuga i le Sea, Ioane ma le Peresetene o le Auuso sili, Malia Tuupo. E ui ua oulua siitia i Vailoa, ae o lo o tumau pea, e le afaina o lo o oulua tautua pea i Aleipata. Lau susuga i le Epikopo, Leulusoo ma Talele Sua. Susu lau

susuga i le Tiakono o Faamanu ma Leu, lau susuga i le faafeagaiga Aso Fitu o le toe Afio mai, susuga Esera ma Emeleta. O le tapuaiga a faafeagaiga e amata mai i Satitoa, lau susuga Vaituu ma Vaisaili Palale o le EFKS, susuga i le tausī Matagaluega Ioane ma Feagai Sefuiva, Tiakono o Ameto ma Christina le Susuga i le faafeagaiga AOG o Mitai ma Filia, lau Susuga i le Epikopo i Malaela, Faletoa ma Leolilo. O Matiatele le susuga i le tiakono o Tanielu ma Oketi Tuilagi. Lau susuga i le faifeau EFKS o Amosa ma Mama Taisa. O Samusu, lau susuga i le faafeagaiga EFKS, Susuga Nukulaelae ma Tuasivi Iati, susuga i le toeaia Manuele ma Kiona Lemoa faapea foi Talia ma Ruta o le AOG. Susuga i Tiakono Katoliko, Lolesio ma Maletina. Afioaga o Amaile, lau susuga i le tiakono o Iakopo ma Eseta.

Ona oo mai lea i Tiavea, Susuga i le faletua, faifeau o Andy ma Akenese. O le susuga i le tausī Matagaluega o Maluafiti ma Faalalafu Iosefa, le Epikopo o Ioane ma Tala, faapea le susuga i le tiakono o Kolio ma le faletua, ma le tausī Matagaluega o Latu ma Maina.

Avea lenei avanoa faaauo e momoli atu ai lau faafetai i la outou tatalo leleoa ma lau tapuaiga mamalu ua amata ai ma le manuia faiva o la outou auauna. E le faagaloina foi nai ou aiga paolo ma gafa uo ma e masani i so o se tulimanu, e le gata i Samoa nei, ae faapea foi atunuu e mamao o afifio ma alaala ai.

E manatua i lou loto e na lagolagoina au, amata mai Satitoa seia oo i Tiavea. Ae a matai uma o si ou nuu o Saleaamua na ofoina mai lo outou taimi atoa mo le faamoemoe.

Lau afioga i le Nofo, Tafua, malo le onosai, faafetai tapuai. Lau susuga i le Sea Faanuu ma lau afioga i le Peresetene Sili o le Auuso Kasalautele Toomalatai. O nai ou uso ma tuafafine, si ou toalua ma lau fanau, i la outou galuega fita faatasi ma la outou tapuaiga ma tatalo, ua ae ai ma le manuia o tatou faiva.

O nai manaoga o si ou itumalo e faatatau i le Tala Faaopoopo o le Tupe. A o le i amatalia se faamatalaga, e lagolago e lenei itumalo le Tala Faaopoopo o le tupe.

O le a ou amata mai i galuega tetele a lo tatou Malo, lau afioga Olo Fiti Vaai. E le tele lava ni manaoga o si ou itumalo. A o le i amatalia e momoli atu le faamalo ma le faafetai i lou tali mai i le tele o manaoga. Ua faapena ona manuia ai le tele o vaega o lenei itumalo. E pau lava lau tatalo i lau afioga, po o fea e ave i ai le faamuamua o lo tatou Malo o Samoa? E i ai le auala lea tuua i Tiavea, lea e i ai le ford lea i Tiavea, na feololo lava na i tagata na maliliu ai o si o matou itumalo. E oo mai i le taimi lenei, e fesili po o fea e ave i ai le faamuamua a si o tatou atunuu. Ioe, masalo na o avetaavale lava a le itumalo lea o matou e iloa vaega o le auala. E le gata ina le lava o faailoilo, ae tataua ona faatino i totonu o lenei 2 tausaga Olo, e le tau selu atu.

Mai o tatou aualagalua, malo faafetai. O lea ua amata o tatou aualagalua. Ae tatalo atu, toe o na i afioaga nei o lo o manaomia lava le faaleleia o aualagalua aua lava faatoaga, o Utu faalalafa, o Lotopue ma Amaile. E faapena foi ona tatalo atu i faapatupatu speed humps ia e faafeagai ma le aoga tulagalua i Samusu, faamolemole e manaomia le faaleleia. Ua manaomia le fesoasoani i le feoi o a tatou taavale. Ua fai foi si tele o taavale ua afaina i faapatupatu ia lau afioga.

E le mafai ona tuua ia alavai, se i silasila lau afioga i totonu o afioaga taitasi. E amata mai i Utu faalalafa seia paia Satitoa. A tetele loa timuga, ona lolovai lea o lea tulaga. E tatalo ina ia faalautele ia tatou alavai.

Ona tuu atu lea i le Pulega o le Suavai, malo faafetai i lau afioga i le Minisita ma le Matagaluega. E faafetai i le tulaga o le suavai. O le tele o nuu o si ou itumalo, e le i oo i ai le suavai, aepeitai ane, malo o lea ua sua le vai i Utu faalalafa, Lotopue, Mutiatele ma Malela. Se malo tali i manao, faafetai fesoasoani mai i le taumafaiga a si ou itumalo. O le Pulega lava o le Suavai, se i tagai ifo i le afioaga lea o Tiavea, o lo o faapena pea, o le tele o le taimi e palapala le suavai. E le gata i lea, e fai foi ma poloka le suavai faapea foi ma Samusu uta, e manaomia lava se fesoasoani i na i afioaga ia.

O le Pulega lava o le Suavai, e tatalo atu ma le agaga faaaloalo. O le taimi nei i le vaega lea o lau Matagaluega, e 75% e totogi e faatoa faaola ai le vai. Ma le agaga faaaloalo e tatalo atu ai, pe le mafai ona tuu i le 50% e faamama avega. E le gata foi i lena, a faapea e toe totogi lau tupe e faaola ai lau suavai e \$75. Ae a fa a lau afioga ae tuu ifo le \$50 po o se tau talafeagai.

O le eletise, malo faafetai, o lo o faapena lava ona auauai mai na i moli faasino ala mo si o matou itumalo. Ae le tuua lava le tatalo, e i ai nai vaega o lo o manaomia ai, ma le agaga faaaloalo.

Ona ou oo mai lea i le Afioga i le Minisita o Aoga ma Taaloga, malo faafetai malo le galua. E tatalo atu i lau susuga i le Minsita ma le Matagaluega, i le faasoasoina o tatou faiaoga. E matauina lava e tofu lava le tausaga ma e o lo o faapena ona faauu mai. Se i alofa se i faasoasoa, ia oo atu lau faasoa i Aleipata, e manaomia lava faiaoga i aoga tulagalua. O le tele o vaega e tai toa 60, tai toa 50 le aofai o vasega ae e le o lava faiaoga.

E tatalo atu foi pe ono mafai ona fai se polokalame mo tatou Kolisi, se polokalame foi lea e fai ai ni vasega faamatata eseese po o ni trades, i tatou kolisi. E aoao ai le palama, faieletise, suisui, kuka ma le kamuta. Atonu e aoga i le toatele o alo ma fanau o itumalo taitasi. A faapea e maua mai ni certificates i i, ia mafai ona faatau e fai ma entry point i le aoga o le APTC po o le Tech.

Lau Afioga o tulaga tau taaloga, a e le i amatalia se faamatalaga, e na ona avatu o le upu faamalos i o tatou alo ma fanau o lo o tauaveina le tatou fua o lakapi taitoafitu i le taimi nei. O lea ua maua mai faamatalaga ua maua nisi o le fanau i le faamai. E leai lava se tatou auupega e na o le tatalo lava i le Atua. O e foi o lo o latou faia le faiva o le tatalo, ia alofagia nai alo ma fanau

ma faalototele na i o tatou aiga, aua ne i i ai se mea e faapopoleina ai, o lo o faasolosolo manuia mea uma.

Ona ou oo mai lea i le Minisita o le Soifua Maloloina. Faafetai i le aufaigaluega ma le galuega sa gapatia ai le puipuiga o le atunuu i le faamai o le Koviti-19, o lea o lo o faasaoina si o tatou atunuu, malo faafetai. E faafetai atu i le Taitaifono o le NEOC ma le latou komiti, malo mo lea auaunaga. Ae se i silasila ifo lau afioga i le Minisita po o le a se tali mai i le tatou CT Scan pe ua lelei ma ua faaoga i lenei taimi. E ono fesoasoani foi i le tele o le mau faamai e ono fesoasoani e faasaoina ai ni soifua. E faapea foi la tatou faata. O lea e maua mai faamatalaga lau afioga, toe tasi lava le faaata o lo o lelei. Se i tagai ane i na i vaega ia. E faapea foi le lifi i le Acute 7, ua fai si leva e le o lelei.

Ma le tatalo e tautuana aseta a si o tatou Malo e manaomia le faaleleia, ma fesoasoani i si o tatou atunuu. E tatalo atu i le tatou Matagaluega, pe mafai ona faaauau pea asiasiga i faleaiga, le asiasiga o taumafa o lo o tali ai sua a lo tatou atunuu. Aua o lo o fai lava si feoloolo o faamai o lo o tatou vaايا. A faatasi i le vaiaso ua manaia tele, pe faalua foi.

Ona ou oo mai lea i le Minisita o Leipa ma Alamanuia, malo faafetai i lau Afioga. E vaايا lava ma le fiafia le faagasologa o tatou galuega faavaitaimi, o lo o faapena ona solosolo lelei, malo faafetai. Ae se i tagai ane i konekarate ia o lo o saina e le aufaigaluega faavaitaimi ma le vaega lea o lo o avatu ai o tatou tagata faigaluega. E tau maua lava o nisi o taimi, e pei ua tau faimamago le vaega lea e o atu ai o tatou tagata faigaluega. Se i taumafai e tagai lau afioga po o mulimulitai kamupani i konekarate na sainia mo galuega faavaitaimi.

Ona ou oo mai lea i le Minisita o Tina ma Tamaitai. E toe faamanatu atu le tatou komiti tumama ma falekomiti i afioaga taitasi. E tasi lea fesoasoani malosi i le tatou Matagaluega, i le faia lea o tui puipui o alo ma fanau, ma le fesoasoani foi i tamaitai ma le Ofisa i le faatinoina o outou tiute. O lo o i ai tatou pulenuu o lo o mafai ona fesoasoani malosi. E tatalo atu a mafai ona asiasi a tatou fomai tai faatasi i tatou falekomiti, ua manaia le fesoasoanoani. E pau le mea e faailoa atu o le a talia lelei e afioaga taitasi ma o latou falekomiti.

Ona oo mai lea i le Minisita o Leoleo, malo i lau afioga Faualo. E faafetai i lau Matagaluega, e leai ni faalavelave na tutupu mai aso fiafia. E tatalo atu e aveaveai le tulaga lelei o lau afioga ma lau Matagaluega. E tatalo foi ia faapena ona tumau pea le faamalosi o leoleo e ala i a tatou tuaoi faavaomalo po o borders, ia aua lava ne i toe ofi mai ni laau faasaina i totonu o si o tatou atunuu. E matauina ua amata ona faateteleina. Lau Afioga, o lea e maua e tasi le taifau o lo o i lau Matagaluega. O taifau foi, e le ova i le 5 itula o galue, a faapea e i ai le oloa ua ova atu i tua i le 5 itula o faigaluega le taifau. O lona uiga ua sao uma ia oloa i totonu o si o tatou atunuu. E tatalo ma le agaga faaaloalo pe mafai ona fai se talosaga faavaomalo ma tatou ma le va

o Niu Sila, pe maua mai nisi taifau taitasi e tailua ai, e fesoasoani i le tausiga o le tatou border, aemaise o le tele o fualaau faasaina.

E momoli atu foi le faafetai i lau afioga ma le Matagaluega i le tele o tatou raids ia e alu ma maua mai fualaau. O le fesili, o fea ea e omai ai nei fualaau i totonu o si o tatou atunuu? O le mafuaaga lena o le tatalo atu, se i tautuana, se i toe faaopoopo mai ma toe koleni lelei a tatou taifau, K9.

Ona ou oo atu lea i lau Afioga i le Minisita o Tupe maua, lau afioga i le Sui Palemia, malo le galulue malo le onosai. E laiti lava na i mataupu, e tau o tutusa lava ma le tulaga o Ofisa o Leoleo. E faapena foi lau Matagaluega, e tatalo atu e tatau foi ona i ai se isi taifau e lua ai taifau a lau Matagaluega e fesoasoani malosi i le leoina o le tatou border po o le tatou tuaoi foi lea faava-o-Malo.

Lau Afioga, e tatalo atu i a tatou taumafa mo le soifua maloloina, mea tau fualaauaina ma tulaga lena, pe mafai ona aveese tiute i tatou oloa ia. E aoga i le soifua maloloina o si o tatou atunuu. Ona maea ai lea o le tulaga o lau afioga i le Minisita, po o le sui Palemia.

Ona oo mai lea i le Minisita o le Siosiomaga, Toeolesulusulu, e tatalo atu pea, se i tautuana le faamamaina o le gataifale o si ou itumalo ma se i tau fai se galuega e toe faaola ai le amu, ma ia fai pea atinae mo le faafofoaina o faisua ma le faasao. Ma le tatalo atu faamolemole, se i fai pea ma fai ni tatou pole i gataifale o Aleipata mo le faalalataina o ia.

Faamolemole, o le fesili lava i lau Afioga i le tulaga i eleele tau Samoa. I le 1998, o le lipoti a le ADB po o le faletupe o Atinae o le lalolagi. E 81% o eleele tau Samoa, ae oo mai i le 2020 ua toe 35% ia eleele. Afai e faamaonia lea faamatalaga lau afioga i le Minisita. O le fesili, o fea ua ave i ai le 46% o eleele faaleaganuu. E fia maua ai sina malamalamaaga lau afioga.

E tatalo atu foi i le tele o taligalu o lo o faapena ona afaina, e manaomia lava se fesoasoani i le toe faaleleia.

E tatalo atu i le tatou togatogo, ia faapena ona toe totoina le togatogo i Lotopue mo le faasao. Ona maea ai lea o le tatalo atu i lau afioga i le Minisita o le Siosiomaga.

Ona oo mai lea i le Minisita o Faamasinoga. Lau afioga i le Minista, e momoli atu le faamalo ma le faafetai tele i lau afioga i le tamataitai Minisita, malo le onosai i nai vesiga na tulai mai i lau Matagaluega, ia toa pea le tai ma faifaimalie ou faiva. E aumai lava e le Atua le laolao e sololelei ai mea uma. Malo le onosai.

Ona oo mai lea i le Minisita o Fesootaiga, faamalo le galulue, e le natia i lenei vaitaimi, o lo o alu i luma le tomai aemaise i mea tau upega tafailagi. E tatalo atu i lau afioga i le auunaga a le Digicel ma le Vodafone, se i tau tuutuu i lalo le tau o le tatou internet.

O le lumanai lava o a tatou fanau aoga, e tatalo i le agaga faaaloalo, pe mafai ona fai ni tatou study centre i afioaga taitasi, aemaise vaega o lo o i ai maota o EFKS i afioaga taitasi. A mafai ona fai ai ni tatou study centre, ua

manaia lea i lau afioga. Ona maea ai lea o se tuualalo atu i lau afioga po o se talosaga.

Ona ou oo atu lea i le Minisita o Tupe, malo faafetai i lou tulai mai. O oe foi o le uluai tamaitai Minisita o Tupe a Samoa, ia aveaveai lou selemalelele i tupe a lo tatou atunuu. E tatalo atu ina ia faamalosi pea se Tulafono, e taitaiina ai tupe foi lea palapala e faaofi mai totonu o si o tatou atunuu, ma pisinisi o fia fai paaga mai ia i tatou. Tatalo atu se i silasila i lea tulaga ma le agaga faaloalo.

Ona see mai lea i lau Afioga i le Minisita o Faatoaga. Se malo le tauivi i lau afioga, malo le tautua, malo le onosai, faafetai le faamaoopopo, ua iloga lou tulai mai. Faafetai lou alofa ia Samoa ma lona atinae. O nai fautuaga lava ma le faaloalo, ia faaauau tatou mea foi nei o lo o faapena ona faagasolo nei mo le talomua mo afioaga taitasi. Ma a mafai ona se i tagatagai lau Afioga i tatou maketi i fafo e avatu i ai fua o faaeleleaga.

Ia ma le tatalo mulimuli, se i faapau le tau o tatou fetilaisa ma vailaau faalelele eleele mo faatoaga uma i totonu o si o tatou atunuu.

Ona faai ai lea, e le faaititia le faafetai i lau Afioga i le Tamaitai Palemia, malo le onosai, malo le tautua, faafetai i lou lavapapale ma lou talitonu i mea e lelei ai le atunuu. O le tuualalo, ia agai i luma lau silasila, aua e te amanaiaina le pola e motu i tua, manatua o le soifuaga tuputupuae ma le tatou saogalemu nei ma a taeao, o lo o i ou aao.

Se i fai pea sina faamatalaga i le vaega lea e fiafia e fai le mea foi lea o le tusi o foliga, le mea foi lea o le facebook. Se i tautuana outou ia e faaogaina le tulaga lea, o si au lava faamatalaga ma le agaga faaloalo, o fea le faavae o le Atua mo Samoa o lo o tatou taulagi nei? Se i silasila i o tatou loto pe mafua i se a? Vaai pe le o i ai se togisala. Pe le o se faailoilo lea mai le Atua i le tatou nonofo lelei. Se i fesili lava oe ia te oe pe afai o faafofoga mai ou tuua i lau gagana o lo o e faaogaina. E mafua i se a le musu e saili se fofo? O le a se faafofoga a le Atua? O se faasinomaga lea ua fai mai e lalaga ai le faautaga, tu, aga, savali ma le amio e sapi ai i le atunuu? E le tauilo fanau a tagata. O le a le mea na tatou ola mai ai? Ua faasino i fea foliga o le faaloalo, o le tofa ma le faautaga e malu ai le atunuu? Se i tautuana lau gagana faasausili o lo o e faaogaina nei, ma ia e manatua, o le fua e te luluina atu, e toe fuaina mai.

Ia, o nai upu faai, e faamalulu atu, o le a sa outou faitau, o le naunauga o le taofi, ia sua pea le la ma aua ne i tau i le mati le gau. Afai e le sua le la i sou manatu, pe apaapa lau sasau e le au, a ua i ai le sao o Aleipata le fale i lalo i upufai o le atunuu. Tau ina ia alofagia e le Atua ia susulu pea Lona malamalama i le Tamaitai Palemia ma lona auvaa filifilia, emo le uila laulelele i lau Afioga i le Fofoga Fetalai, ia faaosofia moegaluaga i le mamalu o le Palemene, ae a le tapuaiga a sui o Malo o atunuu mai fafo, le tapuaiga a Ofisa Sili o Pulega o Matagaluega ma Faalapotopotoga Tumaoti, aemaise

lau tapuaiga mamana Samoa, ae ou ola ma maloloina i le alofa o le Atua. Manuia tele le Fonousu a Samoa. Soifua.

Na faaalua le agaga fiafia o le Maota i le patipati o latou aao i le maea ai o le Saunoaga Faa-Taupou a le sui usufono mo Aleipata Itupa i Lalo.

FOFOGA FETALAI: Ua faamalo faafetai saunoa i lau Afioga i le sui usufono mamalu mai Aleipata Itupa i Lalo, lau Afioga Faleomavaega Titimaea Tafua. Ua malo saunoa. E talitonu foi ua leai lava se vailiu o lou itumalo e le i oo i ai le saunoaga. Ia, o foliga ia o le sui usufono o lo o i ai le agaga o le alofa moni i le itumalo ma mea faaleleia.

Faafetai o lea foi ua faaalua lou agaga lagolagoina i le Tala Faatatau Faaopoopo o le Tupe, aemaise foi manaoga o si ou itumalo o lea ua faaleo. O lea ua faafogafoga atu ma le totoa le Tamaitai Palemia ma le mamalu o le Kapeneta aua lava le manuia auiluma o si ou itumalo. Malo saunoa. Faafetai o lea foi ua e fautua foi aemaise foi o lenei vaitaimi i mea o tusi faafoliga, ia, malo, malo le tofa. Atonu o lea foi e faafogafoga mai i latou i ia mea, malo le tofa, faafetai le silasila mamao aua le toamalie ma le toafilemu o le atunuu.

Ia, malo faafetai mo le saunoaga. Ia, ou te iloa o le avanoa lenei mo se tasi o sui usufono mamalu.

O lea ua matau atu o lea ua fofou mai le sa o le sui usufono mamalu mai le itumalo o Falealupo, lau Tofa Fuiono Tenina Crichton. Ia, o lou avanoa lenei lau Afioga i le sui usufono mamalu.

SAUNOAGA FAA-TAUPOU

Afioga FUIONO TENINA CRICHTON (Falealupo): Faafetai tele mo se avanoa taua ua maua lau Afioga i le Fofoga Fetalai o le Maota o Samoa aua le taeao ma lona tau amataina. E faatulou foi i lau Afioga i le Tamaitai Palemia, lau Afioga Fiame. Afio lau Afioga i le Sui Palemia aua lenei aso ma le fonotaga. Afifio a outou Afioga i alii ma tamaitai Minisita o le Kapeneta, aemaise le paia o Sui Minisita ua afifio ma papaaao i lenei Maota, aua lana fonotaga muamua o lenei tausaga 2022.

E faatalofa atu foi i le la Itu o le Maota, e ui o lo o taulia le fala i le Afioga i le Taitai o le Itu Agai, ae o lo o susu mai lau Afioga i le Sui Taitai aemaise o sui usufono mamalu o le Palemene o le Malo o Samoa, aua lana fonotaga muamua o lenei lava tausaga ua tatou aulia.

Ae tainane foi o paia maualuluga o upufai o Malo i le afio o le Ao Mamalu o le Malo o Samoa ma le Masiofo, ae tainane le Afioga i le Sui o le Fono a Sui Tofia le Afioga ia Le Mamea ma le Masiofo.

Afio foi le Faamasino Sili o le Faamasinoga aoao a Samoa, aua ona tulaga faalupelupeina.

Afifio foi le paia o Ofisa Sili o Pulega o Matagaluega eseese a lo tatou Malo aua lenei aso, ua aofia moli i futiafu e tasi aua lona faamoemoe ua taunuu, o le laau manogi lea o le soifua. Malo faafetai aua o lea ua tatou i luga o le gaga aua le tatou faigaluega pea i lea taimi ma lea aso. E lagona ai le faafetai ina ua tatou maua lenei taeao fou.

Ia, aemaise foi o le nofo tapuai mai o le tatou atunuu aua Upolu ma Savaii, Tumua ma Pule Ituau ma Alataua, Aiga i le Tai ma le Vaa o Fonoti.

Ia ae tainane o le tatou Motu i Sasae, Tutuila ma Manua, Sua ma le Vaifanua, Fofu ma Aitulagi, Saole ma Saleaamua ma le Launiu na Saesae. Ia, a o le motu ia Manua i le Laau Amotasi, Tootoo o le Faleula, o le la o lo o i ai le Faleula Tauaitu ma le Faleula e Tau i Tagata. O lea ua atoa le manoa e sau i Saua seia paia Falealupo i le mea e tuvaofono ai Fuiono. O lea la ua faafofoga le atunuu o Samoa ona o lenei aso matagofie ua tatou maua. E talitonu foi le taofi, ia tau ia ina faapopo i le Vaiutufia, ae taele i le ava soifua ae faatata i Palalaua. Ia faafofofo ia i Malie ma Vaitoelau, aumaia sa o Maauga, aua o le taeao ua laveitiga. E le faaiteau la pe ou te faatapaisau e faigata ua malu le Maota Fono o Samoa i ona tafa e fia o le Maota, e tilotilo ma le vaai, e popoe se taofi ne i lape se lagona, a o le agaga o se avanoa ua maua e fiafia ai i lenei aso ma lona faamoemoe.

Ia, ae tainane foi se oo atu o sau faatalofa i si ou itumalo pele i Falealupo. Ia, aua le susu o faafeagaiga e fia o le Aiga o Sa Levi, le Susuga ia Leauma o se ua matua i le galuega a le Atua, e penisione nei i le Fono Tele i Malua i le tausaga lenei. Ia, le susuga ia Namaia o le fofoga o le Pulega a le Itu o Asau. Le susuga ia Iulio o le faifeau Katoliko Fesoasoani. Le susuga ia Peia o le faifeau LMS. Le Afioga ia Patele Faifeau Katoliko, le afioga i le Tiakono, o le Tiakono o le Ekalesia Katoliko Roma. E faapea foi lau susuga i le Epikopo aua le galuega o lo o feagai ma ia, aemaise foi o le faifeau Aso Fitu o le Toe Afio Mai. Malo faafetai taputapu mai.

Ia ae tainane le paia maualuga i le afio o le Tupu na Faanofonofu le Afioga ia Auvaa ma Auvaa, ae tainane le afifio o le Usoalii, le Aiga Sa Seumanutafa ma le Aiga o Sa Amituanai, le afifio o Maopu o Nafanua o Solia ma Foaima, ae tainane le afio o le Maota a o le malae i Titiuatoa, le afioga i le Matua ia Lamositele, a o se alaafaga i lo latou Toafa, Fuiono, Taofinuu, Soifua, Taii ma Silialaei. Le mamalu o le tapuaiga e tasi lava ia Samoa. Ae tainane so matou itupa ma so matou leo, i le tapuai mai o faletua ma taus, saoa, augafaapae, le malosi o le Komiti faapea foi le aumaga a Toleafoa aua le latou galuega tautua e faifaipea.

Ia tuu maia o sa outou lima tapuai e taumafai ai se leo o la outou sui usufono aua le aso lenei ma le faamoemoe, o se avanoa lelei ua maua i le tauaofiaga muamua a le Palemene o lenei tausaga.

Faafetai foi i nai o matou uso o lo o i atunuu e mamao, e ui lava o lo o i inei mamalu o le itumalo, ae tou te feoi pea ma feaveai aua Aiga, le Toafa ma Silia ae tainane o le loaloa o tama fanau a lo tatou itumalo o lo o i atunuu

i fafo. Malo faafetai. O lo outou aao foai ma lo outou aao alolofa ua mafai ai ona maua se mea lelei e tua i ai le faamoemoe o le itumalo aua lenei tausaga ma le tauaofiaga.

Ia e faapea foi le oo atu o se gagana i nai ou aiga o lo o i atunuu e mamao aua la outou fesoasoani mai pea i le taumafaiga a o alo le vaa i le vaa soua sa taumafai ai ina ia maua se malu e folau malie ai. Malo tapuai, malo le alolofa e faatino ai se feau ma se agaga taua. O lenei la aso, ia o le a faia so tatou manatu, so tatou leo, a o faafofoga le Palemene aoao o Samoa aua lona faamoemoe.

Faafetai i lau Afioga i le Fofoga Fetalai, faafetai mo le tauaofiaga ma lona amataina, malo i lau Afioga i le aiasula mo so matou taofi, o lau Afioga o le Papaliitele. E lagona le taua ma le faafetai aua e matagofie faiva e faatino ona o le aga faaaloalo aua le Palemene o Samoa. Malo faafetai.

Ia, lau Afioga i le Tamaitai Palemia, malo faafetai. E tau loa o le a e lauga atu i se po, e le emo ou mata ia te oe, ona o le tilotilo a Fuiono, o se Palemia ua agafau lona faaaloalo i le atunuu ma upu. E le soona faia lava se mea e paovale. I le gagana lava ia e faatino ai, e le tau fai atu. O le gagana a lalalafa tuna o le Tuiatua, malo faafetai i lau Afioga i le Tamaitai Palemia mo mea lelei o lea ua amata ona savalivali i ai le taumafaiga a lo tatou Malo ia aua se lelei mo Samoa aoao. O a foi mea o lo o silasila i ai lau Afioga e ono afaina ai se tasi o le tatou Itu, aveese ma le faalavelave ae ia fai mea lelei, fai mea sao e tilotilo i ai le fuafuaga aua lo tatou Malo atiae mo a taeao. E le tele ni manatu ma ni manao o Falealupo.

I le lagona, e toe manatua lava i lou loto, leaga ua sopo sou manatu. Ou te manatua pea i lou loto le uso, a o le tama sa tulai mai i le foe o Falealupo, le Afioga ia Aeau Peniamina, o le isi lea toa sa i ai i totonu o le Palemene, aua po o fea lava e fai ai, e tu lava Aeau ia na o lana itu tetee e toatasi ae lagolago i ai Falealupo. E le galo lea tama sailimalo. E ui ina ua gasegase, a o lo o gasegase ma lona manumalo, e le i faiaina. Ia avatu ia i ai le alofa o le Atua aua lona feagai ai ma ona tino le atoatoa le malosi.

Ia lau Afioga i le Minisita o Galuega, lau Afioga Olo. O mea aupito taua lava nei o lo o manatu i ai le sui usufono, o le gagana foi lea a le itumalo, o auala. Aua o lea faatoa ou iloa ua ola se masini i eleele o Falealupo, ina ua e tulai mai na fai ai le auala ae ua lalata le palota. O le matagofie o lena auala, maimau e Olo pe ana faapea na alu lava ma sosolo atu ma le ta. O lea ua amata ona toe aia le ala, ia ona ua tetele timuga. Ae a faamautu lelei nai au mea na, o le manaia, e ese lona matagofie.

Lua, Olo, o le isi auala o lo o i tai, o tai i le igoa o Tapaua, ia e alofagia o lena e tumu ai i ina tagata o lou aiga ae le o faia se auala, leai ma se vai o alu i ai. O le tatalo Olo ia e alofagia lenei nuu mamao ina ia e vaai i tulaga ina ia faafaigofie, aemaise foi o le aualatele seia tau agai i tai i le aai. O le mea taua ua feoi ai le Malo, ua outou mautinoa le le lelei. O le mea lea lau Afioga i le Minisita, ia e alofagia ia oo atu i ai ina ia faia ni galuega e

faaleleia atili ai aua foi le feoaiga o fanau aoga aemaise o le itumalo aemaise foi o malo turisi tafafao. E pei o le lape lea o lo o faavaatua ai ona o lo o latou iloa e ala faaletonu tulaga o ala o lo o i ai nei. Ia, o le uiga lena Olo e tagitagi a le pumate se i tulou le Maota aua se leo o Falealupo, o mea taua lava ia o lo o manaomia tele e le matou itumalo, o mea tau auala. E talitonu a lelei alagalue, lelei ala o le aai, ua faigofie auala ona felafatai agai i totonu aua le taumafaiga o lona atinae o le tamaoaiga i mea lelei aua le atinaeina o Samoa i ona tupe maua ma ona tupe faatino aua foi galuega fai.

E pei o itu ia o lo o mamafa i ai se taofi ona o mea lava tau auala, faatasi ma le aualaua lea e i gauta e sau i le faleoloa o le Letaga Uati seia pai mai agai i tai i le vaotele i le mea lea o lo o i ai le ala laupapa, a e silasila i ai, o le auala na fai ua leva, a ua le toe i ai se faiga faalelei, ae o lo o nofoia pea e alii ma failauga o le itumalo o Falealupo. O le tatalo la lea i vaega ia tau auala, aemaise lava afai e fai auala, e faigofie foi ona alu atu ma le vai e faatino ai lo latou nonofo ai aua lo latou foi lumanai manuia aemaise o le taumafaiga o le eleele ina ia galueaiina. Ia, o nai vaega sili na ona tuualuga i se taofi o Falealupo, ona o ona auala ina ia matua lelei.

FOFOGA FETALAI: Ia, ua ou vaelupeina le saunoaga matagofie a le sui usufono mamalu mai Falealupo. Talu ai ona ua tatou oo mai i le tatou malologa masani, ia, e toe maua lou avanoa pe a maea mai le tatou malologa masani.

Ia, o se tasi o fautuaga mo le sui usufono mamalu, atonu o lea foi e faafogafoga mai sui usufono, o le tatou Tulafono Tumau ia tatou faaeteete mo le tauga o suafa o sui usufono mamalu. O lo o faaaoga pea tofiga o Afioga i Minisita, ae aua le tatou faataumamao ma tau o suafa o sui usufono mamalu, aemaise foi o Afioga i Minisita, ma sui usufono mamalu uma o le Palemene. O tatou Tulafono Tumau, ave pea le ta'u faaaloalo o tulaga mamalu o lo o i ai tatou sui usufono.

E faasilasila atu o le a faataatiaese nei Galuega a le Fono Aoao Faitulafono mo lana malologa masani.

Na faataatiaese Taulumaga a le Fono Aoao Faitulafono mo lana malologa masani i le itula e 10:45 i le taeao ma toe faaauau i le itula e 11:26 i le taeao.

FOFOGA FETALAI: I le toe amatalia ai o tatou Taulumaga, tatou te faafetaia pea le Atua i Lana foai, ua matu i fau le tauteaga ma le taligasua a outou Afioga. E i ai foi le talitonuga ua maua se faasiliga malosi e faaauau ai le tatou galuega.

E faataatiaese a tatou Taulumaga mo malologa o le taeao o lo o saunoa le sui usufono mo Falealupo. Ou te tapa ma le faaaloalo le sui usufono mamalu e te tulai mai mo le faaauauina o lau saunoaga. Le sui usufono mamalu.

Afioga FUIONO TENINA CRICHTON: Faafetai i lau Afioga i le Fofoga Fetalai. Faafetai mo le avanoa aua foi o lea ua maea mai tulaga o lenei aso aua foi le faaaloalo sa tali ai le malu o le taeao.

O lo o gata le talanoa a le sui usufono mo Falealupo, ua faasolosolo atu agai i le Minisita o Faatoaga ma Faigafaiva. Lau Afioga i le Minisita, e le faia se upu i le tofiga mamafa o lo o ua i ou aao, a o le lagona fialia ma le faagaetia, ua amata ona gaoioi tulaga matagofie aua le taumafai atu o le Ofisa o Faatoaga i so o se mea e faaleleia aua le eleele mo le galueaiina. O le mea taua i le vaai, ua aoga tele le faasavaliga na o atu ai la outou Komiti i lea afioaga ma lea afioaga, ua pei ua outou tea ese atu ae ua lagona e tagata le taua o le feau. Ua malosi le gagauina o le vao, se i vagana lava foi ē e masani e tafafao e le fialia e galulue, a o tagata na, na pau lava le mea na te maua o le mativa, e le o galue, e le o gaoioi.

Na pau lava o le tatalo i lau Afioga, ia o tulaga lava ia o le tamaoiga o tatou i Savaii lava ia, e tilotilo agai i le popo ma le koko. O le mea taua tele lea mo le faafaleleina i lea Ofisa o Faatoaga ma lea Ofisa o Faatoaga ina ia tua i ai le aufaifaatoaga i le taimi vave e galueaiina ai eleele aua le faatupuina o ni fua lelei ia aua e olaola lelei ai le tamaoiga o le atunuu i lona faatinoga o galuega faatino i lea tausaga ma lea tausaga. Aua foi e leai se galuega e fai atu loa fua mai. E leai, o le 6 masina agai i le tausaga, ua vaaia loa ua amata ona lauusi mai le ola fialia o meatoto, aua o le a oo i le taimi e fua mai ai ma selesele aua le tagata toaga e galue.

Ae tainane foi o le itu i le sami, itu tau faigafaiva, o le isi lea oloa tele a le atunuu o lo o i le sami. E leai lava se oloa pito vave le gaoioiga i mea tau tupe, o le sami lava. A tilotilo lau Afioga i le Minisita i lou lava vaai ma le tilotilo, o lo o vaivai le au fagogota, ona e a? E limavaivai mo le faatauina o mea tau vaaafi, aua na pau lava na o mea e mafai ai ona o i le sami mamao e aumai ai i'a lelei e aoga i le taumafa. Ae i lau vaai afai ae alu sau fuafuaga i totonu o le atunuu e tai 3 vaa fagota o lea nuu ma lea nuu mo le galueaiina o mea nei, ia, ou te fai atu e matautia le sau o le tamaoiga o le sami. Aua e le fai atu ita, o lota nuu i Falealupo e leai lava se nuu pito i'a le sami e pei o le nuu lenei leaga o i e toa i ai le auau o tafega, so o se ituaiga taimi, e te savali i luga o le papa, o lou oso i lalo o le sami ma le matatao se i tulou lava le Maota, e le tau sueina se i'a taumafa e pei o le tilotilo lea ma le vaai i mea taua tele o lea o lo o nafa ma lau Afioga i le alii Minisita.

O tulaga o mea uma, o meafaigaluega, faafetai. Faatoa oo atu lava lea o ni iliafi i le matou nuu. Ia, o la ua faaoga, ua tau tauafao foi, ua tau tauaimisa i ili, ou fai atu; ia leai, aumai ili e ave e loka i lou fale leaga o lea o le a ou alu i Apia i le Fono. Ia ai ua fia mananao e faaoga, ae o lea ou te i inei ae o la

e loka i lou fale, ona ou te manumanu i mea na e tigaina e fai. I le agaga lena ma le faaaloalo, e ese le matagofie o ia fuafuaga lelei. O nisi mea lelei ua e silafia e atili faaleleia ai ia mea uma, o lo o i ai lava le tofa i lau Afioga e faafaigofie ai ona faatino tulaga aloaia mo le lumanai, aua o le puna lava lea o le tamaoiga o Samoa, o le eleele, o le sami. E moni lava foi i galuega o lo o galulue ai ia a o le faatinoga o le mafaufau lena. A o le faatinoga o le gaoioiga o le tagata i mea e gata ai le malosi, ia o mea silisili na ona taua. Ia, o se loto lena i lau Afioga i le Minisita o Faatoaga ma Faigafaiva.

Oo mai sau tala i lau Afioga i le Minisita mo le Soifua Maloloina lau Afioga Valasi. Faafetai tele i lou tulai mai i lau Matagaluega. O le faasologa o taimi na sau ai le tatou itumalo, sa le maua se fomai, ioe, ae sa kili i Salelologa i Tuasivi gasegase mafatia. O nisi lava o gasegase e maliliu lava i ala ona o le mamao. Aua foi a omai i i, ia, na o nai teine la e i ai i le falemai, e tau vili i Tuasivi po o le a se faatonuga mai. A aumai lava le faatonuga e aumai e sese, aua e le o vaai i ai le fomai. Ae o le i ai o le fomai, o le taua lea o lo o ua i ai i le taimi nei. I le lagona foi, e faapena lava i falemai uma, ua le tatau ona toe tuuaunoa lea falemai ma lea falemai ina ia maua e tagata uma le faafaigofie o le sailiga o le soifua maloloina nai lo le tausaili mamao o se togafitiga e aoga i le tino ma le mafaufau o le tagata, aemaise foi o tamaitai galulue. Silasila pea lau Afioga, o lo o i ai le tamaitai galue lena o lo o i ai i le tatou falemai i Sataua, se i ou alu atu ona ou avatu lea ia te oe, e tatau ona faamalolo ma le galuega. E le lelei, e le fiafia au e pupula i tagata faapea, leaga a e fesiligia ona e iloa lea o le sao, e le o se falemai foi lele e tafafao ai. O e fai ni a latou feau ma ni a latou facebook i o latou aiga, ae aua le faia i i i le galuega. O le mea lava lena e fai e lena teineitiiti. O le vaega lena e logologopuialii i lau Afioga mo le faatinoga o lau galuega.

Ia, e tilotilo foi, ua i ai foi taavale ave mai ua i ai nei i lo tatou motu, ua oo foi i lo tatou itumalo o Asau. Faafetai tele ua i ai taavale ua feaveai ai gasegase e vave ai le kili o le soifua agai i se mea mamao po o le oo mai lava i Apia nei. O mea ia e tilotilo i ai i lona taua tele, o mea e faatino ai le galuega, aua le taimi e faaauau ai le feau ma le tofiga ua tofia ai, aua Samoa ma lona manuia mo a taeao.

O le mea lea e faafetai atu ai i lau Afioga i le Minisita o le Soifua Maloloina, i le auaunaga matagofie i le tilotilo ma le vaai. Ae lelei lava le fai pea ma asiati atu, leaga a le vaai soo foi lau Afioga, ia ua faapena foi ona taaalo falemai ua faaleano foi lele i tagata. Ia, o le soso atu lena i lau Afioga, aua foi lenei aso ma lona faamoemoe, aua le tatou galuega.

O nisi o itu uma o lenei aso aua le nofo a Minisita, leai, e talitonu e i ai taimi e oo mai ai ni lagona i nisi o mataupu, a o mea lava ua avatu ma le naunautaiga o lenei itumalo o Falealupo, o lea ua uma ona fofola atu, aemaise lava o le aai ma ona ala e pei o le Minisita o Galuega ma le Afioga i le Minisita mo Faatoaga, ma le Afioga foi i le Minisita o le Soifua Maloloina. O lagona na aua le tatou tautua faifaiepa i lea aso ma lea aso.

Faafetai foi i lau Afioga i le Minisita o Tupe. E ese le matagofie o le taitaiga o le Tala o le Tupe. O le Tala ia o le Tupe o le tatou Fonotaga i lenei taeao, o le matua lagolagoina e Falealupo, aua e matua iloa le moni ma le faamaoni, e faataoto i ai le Tala o le Tupe aua taualumaga o ana Fonotaga i lenei tausaga.

Ia o nisi o itu e fia oo i ai se talanoa, o nai sui usufono e pei ona taua e le Afioga i le Fofoga Fetalai, le Afioga ia Tapulesatele, o ia o le sui usufono mai Vaisigano Nu.2 i le Paeaiga ua mavae atu nei. Ia, e toto, e ivi, o aano. Ua lagia ai foi Fogaavii, gasolosolo ao, taape papa, ia aemaise foi o le lagia o le Maota o Paepaeolefoa o Tumua e afio ai lana Afioga i le Valasi, o le usugafono foi ia Lealuga ma le Falefa o Taua aua le taeao ma le aso. E ui ina ua taia le lau upega i le tatou Maota ona o le valaau a le Atua, ae faafetai, lea ua malaga ma tofia nisi e malaga atu, a o loaloa le soifua maua ma le lagi e mama.

Le Afioga foi ia Vaai Papu po o le Mafasolia Papu, o se tasi foi o sui usufono o lenei itumalo mai Falealupo. Faafetai o lea ua manino saunoaga a le Fofoga Fetalai, o se tagata foi sailimalo, tautua nuu i tulaga tofi sa i ai. E leai, e talitonu foi o le lagia lea o le afioaga o le Tupu Faanofonofu ma le paia o Aiga, ae tainane se usugafono i le latou Toafa ma Silia, leaga ua tuumalo le Afioga i le Maopu a Nafanua le Afioga ia Solia, leaga o le Afioga lea ia Toleafoa, o le tamaloa na alu atu i Leulumoega, lea na usu ia Falealupo, ona maua loa lea o le aualii ia e toalua. Ia, o le agaga faafetai, leai o lea ua silafia e le Atua le momoli mai o le faamaisega e lau Afioga i le Fofoga Fetalai, aua le tatou Paeaiga, aua tatou te le iloa foi mo a taeao, mo i e lua ma le soifua ma le ola, leaga e galulue tatou, ae i ai le pule i lo outou soifua ma lo tatou ola. Faagatamala ia le Maota, aua tulaga o le valaau, ae tatou ave le agai i luma o le soifua auauna ma le soifua manuia i le tino, faasilisili le mafaufau ae ola ma ia maloloina atu.

O lena se leo faaiu o Fuiono mai le itumalo o Falealupo, manuia lau Afioga i le Fofoga Fetalai, Afioga i le Palemia ma le Kapeneta, aemaise foi le Taitai ma le Sui Taitai. Ia manuia le aso.

Na faaalua le agaga fiafia o le Maota i le patipati o latou aao i le maea ai o le Saunoaga Faa-Taupou a le sui usufono mo Falealupo.

FOFOGA FETALAI: Ia, ua faamalo saunoa i lau Afioga i le sui usufono mamalu mai Falealupo. Malo lava le tofa, faafetai foi mo le saunoaga malamalama aemaise foi o le lagolagoina o le tatou Tala Faatatau Faaopoopo o le Tupe, aemaise foi o le amanaia foi o nisi sa tautua i le Nofoa o Falealupo.

O le mea lea faafetai i lau Afioga i le sui usufono mamalu, o lea lava ua oooo lava le saunoaga, aemaise foi o atinae a lou itumalo, atonu o lea ua faafofoga atu ma le totoa le Afioga i le Palemia faapea foi le mamalu o le

Kapeneta aua foi manaoga o lo outou itumalo. Malo faafetai, malo saunoa faa-toeaina.

Na pau lava si fautuaga, i nisi foi o sui usufono mamalu, ia ua le faalavelave lava i le sui usufono sa saunoa nei, ia, aemaise lava o le tauina o le aufaigaluega a lo tatou Malo, ia tatou lagona pea le faaaloalo i tatou tulaga masani, o lo o i ai lava i latou o lo o silasila i tulaga ia, a o le tatou galuega, ia tatou te vaai ma silasila i le agai i luma ma faiva faavae mo le lautele o le atunuu. Ae talitonu, malo saunoa. E talitonu foi o lea ua fofola mai le tofa, ia talosia ia le faamoemoe o lou itumalo ma le usugafono a le atunuu.

Ia o le taimi lenei ua avanoa le tatou Maota mo se tasi foi sui usufono.

Ia, o lea ua maua atu o lea ua tulai mai le sui usufono mamalu mo Falealili 2, le Afioga ia Maiava Fuimaono Tito Asafo. O lea ua ou taua lou suafa i le amataga, o lea faatoa e tulai mai mo lau lauga faataupou ma sou finagalo aua le Tala Faaopopo o le tupe.

Ma le agaga faaaloalo e tapa le sui mamalu.

SAUNOAGA FAA-TAUPOU

Afioga MAIAVA FUIMAONO TITO ASAFO (Falealili 2): E faafetai i lau afioga i le Fofoga Fetalai mo le avanoa e fai atu ai se sao o lenei itumalo, aua Samoa ma ona upufai.

E manatu i lenei aso e le taufaafoina papafo. Ae ao ona ou faamanusina le atumua. E ui foi e le o se atu a le tautai, a o le atu a le foemua. Ae talitonu ma le atoatoa, o le sagatonu lea o lenei taeao, aua le tapuaiga a Samoa o lo o faafogafoga.

O le paia lava lea aua le tapuaiga a Tama ma o latou Aiga, o Aiga foi ma a latou Tama, Tumua ma Pule, Ituau ma Alataua, Aiga i le Tai ma le Vaa o Fonoti.

E faapitoaugafa se faafeiloai i lau afioga i le Fofoga Fetalai o le Maota, lau afioga Papalii Taeu Masepau. O lau afioga lava o le foe tuese, o lou siufofoga foi e faalogo i ai le Maota lenei. E faafeiloai ma faatalofa atu foi i le uluai tausala Palemia o le Malo o Samoa. Lau afioga i le Sao na Faapito, lau Afioga Fiamé Mulinuu II.

E faafeiloai atu foi i lau afioga i le sui Palemia, lau afioga i le Saoalii, lau afioga Tuala Tevaga Iosefo Ponifasio.

E faatalofa atu foi i afioga i tamaitai ma alii Minisita o le Kapeneta aemaise o afioga i Minisita Lagolago o Matagaluega taitasi.

E ofo alofa atu foi i le afioga i le Taitai o le Itu Agai, e ui foi e le o paau mai ona o gasegase o le tino, e ofo alofa atu ai lenei itumalo, i le afioga ia Tuilaepa Sailele Malielegaoi aemaise o le afioga i le Sui Taitai ma afioga i sui usufono uma o le Maota.

Ou te faatalofa ma faatulou i le afio i lau Afioga i le Ao Mamalu o le Malo o Samoa, lau afioga Tuimalealiifano Sualauvi II ma lau masiofo. E faatalofa atu foi i lau afioga i le Sui o le Fono o Sui Tofia, lau Afioga Le Mamea Tapulesatele Ropati Mualia ma lou faletua.

E faafeiloai atu foi i lau afioga i le Faamasino Sili, o Tamaitai ma Alii Faamasino o le Faamasinoga o Soligatulafono. E faatalofa atu foi i le Peresetene, afioga i Tamaitai ma Alii faamasino o le Faamasinoga o Fanua ma Suafa.

E tuu atu le lima ma faatalofa i afioga i Ofisa Sili o Matagaluega uma a le Malo aemaise foi o Matagaluega Tumaoti.

Lau Afioga i le Fofoga Fetalai o le Maota, e le galo le galuega faifaiepa a le aufaigaluega tofoti a le Atua. E latou te popo ai i fale, i manu i fale ma emo ai le uila emo ao. Ua ae ai ma le manuia le faatautaiga.

E faatalofa atu ai i Susuga i faafeagaiga ma o latou faletua i fatafaitaulaga e fia i Samoa.

Lau afioga i le Fofoga Fetalai, e manatu o se taimi taua lenei mo au, i si ou itumalo o Falealili 2 aua le faleseee i lana tapuaiga.

Lou itumalo o Falealili 2, talofa e i la outou faatupu ma le faaaloalo, ua outou filifili ai le tagata faatauavaa ua mafua ai ona ou tumatie. Ua taunuu le upu a le atunuu, ua taulua i le tuna la outou tofa. Ona ua outou filifili le vaivai ma le faatauavaa, e fai ma auauna. Ae o se savali foi a le itumalo aua Samoa ma ana upufai.

Ou te ofo alofa atu ma faatalofa i si ou nuu pele o Salani. O paia lava ia aua le afio o le aiga sa Fenunuivao ma le latou tama, afio ai Fuimaono ma ona alo tutusa, afio Sefuiva o le Matuaalii. Susu Leasiolagi o le saoa. Malii mai lau tofa Tofuaiofoia, alalatai Sataeleava tainane le fuaiala aemaise foi Tupua ma le aumaga. Tulouna Sataveavae, o le alii mai o faleupolu.

Ou te faafeiloai atu foi i si ou nuu o Salesatele i le afio ai o Tapulesatele ma ona alo ma alo o Leilua, afio mai Paitomaleifi o le aloalii, susu le susuga Leota, alalatai foi le matua ma tama a le falelua faapea le tofa o Talimalama ma upu i le fuaiala.

E faatalofa atu foi i lou nuu o Siuniu, aua le afio ai o le taofia o Moeletalalelei ae alalatai le to'afa.

E faatalofa atu foi i si ou nuu o Sapoe, i le afio ai o o Sa Alalatoa ma alo o Samalaeulu, malii mai lau fetalaiga Gaopoa le tulafale a le Tuiatua, malii mai lau fetalaiga Letogaitulaitupuaa, o oe o le faialaga. Tulouna lau tofa Faatili tainane Sa Faatili ma lona faleono.

Ou te faafeiloai atu foi i si ou nuu o Utulaelae i le afio ai o le aloalii, susu Tufugafale ma Seugalii, ae alalatai le faletolu ma le Lauti na Laulelei.

Lau Afioga i le Fofoga Fetalai, ae le i fai atua ni manaoga o si ou itumalo, e muamua ona momoli atu le agaga faafetai tele i le Afioga i le Minisita o Tupe, ma le mamalu o le Komiti o tupe mo le galuega maeaea. E matua

lagolagoina lava e lenei itumalo le tala faatatau faaopoopo o le tupe 2020/2021.

Lau Afioga o manaoga nei o si ou itumalo, e muamua o aoga. Lau Afioga i le Fofoga Fetalai, o lea ua maea ona faataatia le Tala o le Tupe i luma o le Laulau a Fono. Ma ua i ai foi se vaegatupe ua faaagaga mo le faaleleia o tulaga i aoaoga. Lau Afioga e talitonu le itumalo lenei, a lelei aoaoga a alo ma fanau, e le taumatea le manuia o a latou taumafaiga. E le pine foi le sasaa mai o manuia e le gata i aiga, o ekalesia, o nuu, itumalo aemaise lo tatou atunuu.

Lau Afioga i le Fofoga Fetalai, e ala atu i le Nofoa se talosaga i le Minisita o Aoga, a lelei resources ma mea faitino e faagaoioi ai aoga a le fanau, o le a le fesiligia foi lo latou tali mai i se taunuuga lelei. E leai foi se uiga o internet ma Wifi o lo o faatutu solo i aoga i tua, pe a leai foi ni computers ma ni laptops ma televise ma isi lava mea e faitino ai lea auunaga lelei.

O le isi lau afioga o le faitautusi po o le reading, o le faitotoa lea o le ola aoaoina i mataupu uma. A lava tusi faitau ma tusi aoga e faitino ai galuega faaleaoaoga, o le a faafaigofie foi galuega faale-faiaoga.

O le tasi vaega lau afioga i le Minisita o Aoga, e ala atu i lau Afioga i le Fofoga Fetalai, o le galuega fita a tamaitai ma alii faiaoga, ua fai lava si faigata ma taugata, ona e alu lava le faiaoga e saili, ma fai ana suesuega i ana lava tupe. O le popolega i lea itu, a fai e taugata meafaigaluega e faitino ai a latou galuega, o le a faaetaealuga foi le faatinoina o a latou galuega, ma le ausia ai e fanau a latou miti na fuafuaina.

E tatalo atu ai foi i lau afioga i le Minisita, o faafitauli o lo o tutupu i aoga i tua, o le le lava lea o faiaoga. E talosaga atu ai ma le agaga maualalo i lau afioga, se i tagai ane, ia foia lea faafitauli. Faamolemole lau Afioga i le Minisita, se i manatua ane aoga a Falealili 2.

O le lona lua o manaoga, lau Afioga i le Fofoga Fetalai, o galuega. O lea ua manino, e le aafia aualagalua i le poloketi lea o le miliona, faamolemole lau Afioga i le Minisita o Galuega, e fai lava si faaletonu o auala o lenei itumalo. O lea foi ua maua, o le a i ai ni auala e faitino ai fuafuaga fou a le Malo, e na ona tanu ae le faataina. Atonu e totoe se miliona a Falealili, ona faata ai lea.

A silasila foi lau afioga, o se tasi o afioaga o lenei itumalo, o lo o faaigoa ai se tasi o tiapula, o lo o numera tasi nei i lo tatou atunuu, po o le tiapula Salani. O lenei tiapula e le gata ua talaave i ai le igoa ma eleele o le afioaga o lo o faaigoa ai, ae na matua iloga foi ona maualuga ai nisi i le faaaliga o fua o faaeleeleaga a le Ofisa o Faatoaga ona o le lelei tele o lona aano mo le fofoga taumafa o lo tatou atunuu.

Lau Afioga, o le mea lea e taua tele ai le lelei o auala galue, ona o le a faafaigofie ai i tagata ona o i uta e gagau le vao, ma toe sua i luga le manuia o lo o tatanu i o tatou laufanua.

O le lona lua lau Afioga i le Fofoga Fetalai, e tauala atu ai i le Minisita o Galuega, o taligalu i talafatai o Salesatele o Utulaelae ma Sapoe. Ua matua aia ma aafia i galu o le sami, faamolemole lau Afioga i le Minisita o Galuega, e manaomia lava ni taligalu i gatai o Salesatele, Utulaelae ma Sapoe. Ma talosaga atu ai i lau afioga i le Minisita. O le vai lea e alu i uta i le afioaga o Salani, o la e alu atu gata i le afa o le auala i uta, e manaomia le faaoo atu pea i uta i nisi o aiga o lo o alaala ma papaaao i lea itu o le nuu o le itumalo.

O lona tolu o manaoga o eleele ma fanua. Lau Afioga i le Fofoga Fetalai, o le tele o fanua ma eleele o lo o i tuamaota ma tualaoa o lenei itumalo ua umia uma e le Malo. O le talosaga ma le agaga faaaloalo i le Afioga i le Minisita o Eleele, pe mafai ona toe faamatuu mai ia eleele i lalo o le vaaiga a alii ma faipule o afioaga taitasi o le itumalo. Afai ae faamatuu mai nei eleele ma au foi i ai auala galue i uta e pei ona talosagaina e lenei itumalo, o le a faafaigofie ona agai nuu taitasi e faatoa eleele e ala i faatoaga niu, koko, aemaise foi lafumanu se i tulou. Lau Afioga, a fai e tini ma tau lau o lenei faamoemoe, e mautinoa o le a togi se maa ma fai se sao o Falealili 2 i le tamaoaiga o lo tatou atunuu ma ona tupe maua. O le talosaga a lenei itumalo i le Afioga i le Minisita o lo o fitoitonu i ai lenei vaega.

O lona fa o manaoga, o le soifua maloloina. Lau Afioga i le Fofoga Fetalai, e momoli le faafetai tele i le Minisita o le Soifua Maloloina ona o se tofa na ae, na mafua ai ona e afea le falemai faaitumalo i Falealii i Poutasi. E i ai le lagona, o le a lava se mea na faaletonu i lau silasila, o lau foi lona vaai. Ae na o se talosaga i lau Afioga i le Minisita. O le falemai la e i Poutasi, o lo o agai atu ai foi le itumalo Safata ma Siumu, aemaise ai foi isi itu o Atua ma Falealili. O le mafuaaga lea ua vaelua ai le itumalo, ona o le toatele o lona faitau aofai. O le talosaga la a Falealili 2, pe mafai ona toe fausia le falemai lea sa i Salesatele, po o le sub centre sa i ai i aso ia faamolemole, mo lea itu o le itumalo, ina ia faafaigofie le femalagaai o tagata, aemaise o taimi o faalavelave faalenatura. Ona e le gafatia e le falemai i Poutasi pe a tutupu mai ni pefea.

O le isi manaoga o le itumalo, o le Ofisa o Leoleo. Lau Afioga i le Fofoga Fetalai, e talu ai o lenei vaitau i le tele o fesuiaiga o le tau, ma faalavelave faalenatura o lo o tutupu mai. E talosagaina ai lau Afioga i le Minisita o Leoleo mo se taavale fuimu mo Falealili, aua ni faalavelave tutupu faafuasei aemaise o mala faalenatura. E le gata i lea, o ni mu e tulai mai i le vaomatua ona o le fesuiaiga o le tau. Lau Afioga, e mafai ona foia ia faafitauli ogaoga pe a fai ae avatu se taavale fuimu mo Falealili. A taunuu lenei faamoemoe, ua atoa tapenaga mo le saogalemu mo le itumalo ona o lea ua i ai le falemai, ma le ofisa o leoleo.

A o i ai pea i lenei vaega, e talosagaina ai ma le faaaloalo lau afioga, i le lola palota a Falealili 2. O le toatele o tagata palota o lo o i lenei lola, e le o ni tagata Falealili. Ae ua faaoga sootaga faale-ekalesia, masaniga faauo ua lesitala ai i le lola palota a Falealili 2. O le ogaoga o lenei faiga, ua mafai ai

e tagata ese e leai ni piitaga i Falealii ona suia se faaiuga e lilifa i ai le tofa i afioaga ma le itumalo. Faamolemole lau Afioga i le Fofoga Fetalai, e tauala atu i ina se talosaga i le Afioga i le Minisita, se i toe silasila ane i le lola palota a Falealili 2.

Lau Afioga i le Fofoga Fetalai, o manaoga na o si ou itumalo, ae ou te le i nofo i lalo, ou te faaaogaina lenei avanoa e momoli atu ai le faafetai tele i susuga i faafeagaiga ma o latou faletua i fatafaitaulaga e fia o si ou itumalo, ona o la outou tatalo ma la outou tapuaiga. E faafetai atu foi i le afioga i le sao o le Aiga Sa Puleimanufiu, lau tofa Puleimanufiu Tito Fuimaono, o le lavalaoa o lo tatou aiga, aemaise o uo ma e masani faapea si ou itumalo na lagolagoina lenei faamoemoe, ua mafua ai ona ae manuia ma tau i manu. E le itiiti le agaga faafetai tele i ou matua, uso ma tuafafine aemaise o fanau, ona o la outou lagolago.

E le faagaloina ou sootaga tau toto ma tau ivi, na agalelei ma fesoasoani malosi mo le faatinoina o lenei faamoemoe. E faafetai atu foi i matua o si ou toalua ma aiga, i latou na fesoasoani, ia faapea foi la outou tapuaiga. E le faaitiitia lou agaga faafetai tele i si ou toalua ma si au fanau i la outou lagolago faifaipea, ua mafua ai ona tulai atu faapenei.

Lau Afioga i le Fofoga Fetalai, o le tatalo a Falealili 2 ia maua lou soifua maloloina ma ia to mai le lagi le tofa a lau afioga, aua o lau afioga lava o le ivi o ia lilo. Ia faamanuia tele le Atua i lau afioga, maua le soifua laulelei i le afioga i le tausala Palemia, le afioga i le Sui Palemia aemaise o le Kapeneta o le Fono Faitulafono. Ia agalelei foi le Atua i lea itu o le vai, le Afioga i le Taitai o le Itu Agai ma le Sui Taitai ma sui usufono uma o le Maota.

O le Tala Faatatau Faaopoopo o le Tupe 2021/2022, ua lagolagoina e lenei sui usufono ma lenei itumalo.

Ia aoga se leo o le sui usufono o Falealili 2 i upufai o lenei maota. Soifua ma ia manuia.

Na faaalua le agaga fiafia o le Maota i le patipati o latou aao i le maea ai o le saunoaga Faa-Taupou a le sui usufono mo Falealili 2.

FOFOGA FETALAI: Ua faamalo faafetai saunoa, faafetai foi malele i le sui usufono mamalu mai Falealili 2. Ou te talitonu o lea ua oooo lava saunoaga ma faafeiloaiga e le gata i le paia o le Maota, a o si ou itumalo, o lo o taputapu mai. O le mea lea, malo faafetai, faatasi ai ma manaoga o si ou itumalo, malo o lea ua faafofoga atu le Palemia ma le mamalu o le Kapeneta, aua lava le agai i luma o si ou itumalo. Malo faafetai, malo tapena.

O le taimi lenei, o lo o manaomia se tatou sui e fia saunoa. O lea e matau atu, o lea lava e tulai mai lea itu, o lea ua tulai mai le sui usufono mamalu mai Safata 2, lau Afioga Laumatiamanu Ringo Purcell.

Ia, o le avanoa lea mo lau saunoaga, aua le Tala Faaopoopo o le Tupe. Lau afioga i le sui usufono mamalu.

SAUNOAGA FAA-TAUPOU

Afioga LAUMATIAMANU RINGO M. PURCELL (Safata 2): Ua faamalo faafetai i lau Afioga i le Fofoga Fetalai, mo le avanoa ua tuuina mai i lenei itumalo e fai ai se sao, aua le Fonousu a Samoa.

E manatu o le a ou le faanunuta pei o le tala i le aigofie, ae tau ia ina ou sisi le pola e pei o le fetalaiga i le faleagafulu o Sa Asomua. Ae manatua foi i le loto le tala e fai i lou itumalo. Ia o le a tafaimaa ia le tamaloa na liufatu i le Alataua. Aisea? Aua o lele ua malutae le paia ma le mamalu o le Maota i Tiafau nei. O lea foi ua maualuga le Maota Fono aua o lele ua malumaunu le fogatia ua malualii le seuga aua le potopoto ai o lau Palemene.

Lou itumalo e o Safata 2, tapuai maia ma le manuia, ae se i fai so tatou sao ia Manuvao, aua le Fonousu a Samoa. E i ai le talitonuga e talii lava ae popoe, aua le tapuaiga a Samoa, aemaise o tootoosina, ma le malutautupu o le saofaiga a le aufatuaiupu ma le aupueupu o le tofamanino.

Ae ou te le i saeloaina la le ututao o le panao e pei o le fetalaiga i le tuasivi, e muamua ona ou taia le ufitaotaigai o le aitu vavau ma ou faatulou e pei o le fetalaiga o le malae i Tumua, Malo tumau ma moeaa aua o lele ua sasaa laau le soligalafoga, a o le vai foi ua suataulu ua suataili. Tulou tulouna lava.

Ou te muai faatulou ma faatalofa atu i le tapuaiga a Le Ao Mamalu o le Malo, lau afioga Tuiaana Tuimalealiifano Sualauvi II, tainane lau Masiofo. E faatulou foi i lau Afioga i le Sui o le Fono o Sui Tofia, lau Afioga i le alo o le Tuiaana, lau afioga Le Mamea Ropati.

E manatu foi ua atoa i tagi o le Maota Fono o Samoa, ua mafua ai ona faatulou ma faatalofa i lau Afioga i le Tamaitai Palemia, lau afioga Fiamē Naomi Mataafa Mulinuu II. E faatalofa atu foi i lau Afioga i le Sui Palemia, lau afioga Tuala Ponifasio.

E faatalofa foi ma faatulou atu i lau Afioga i le Fofoga Fetalai.

E faatulou ma faatalofa atu i lau Afioga i le Taitai o le Itu Agai, e ui ina tatou le mafuta i lenei aso i le faataotolia i mai o le tino, ia agalelei le Atua e toe faafoi le malosī. E faatalofa atu foi i sui usufono mamalu uma o le tatou Palemene i lenei aso.

Ou te manatu e le toe fagota sagolegole se isi i aso faapenei. Aua o lea ua oootutu le tai i Tiafau nei, aua o le Malae o le faautugatagi a Samoa. E manatu foi ua atoa i le Maota nei le fatueleele o Malo. Aua malae ma tootoo faitauina o le usoga a Tumua ma Pule. Ia taalolo la ia paia o le taeao ma le aso.

O lenei aso se ua moni ai saafiaga a le tamaitai o Gatoaitale ia Malietoa, ma faapea ane ai, se ua ese lava lau vaai i lenei taeao i le pupula faaauo o

lenei taeao. E faapena le pupula faaauuro o le alofa o le Atua lea e faavae ai si o tatou atunuu o Samoa. O lenei ua tepa i ula, ua futifuti a manuula, ua mua o, tini o, ua titi e, ua titi.

E faafetai i le Atua ona o lona alofa ia Samoa ma lenei Palemene. O lenei ua fesilafia i pue o manu ae le o mala. O lo o folau pea Samoa i le malu. E ui lava ina taulagalaga peauvale i faamai ua lofia ai si o tatou lalolagi ma suiga maaleale o le tau, ae o lo o tapaaa o pea i le alofa ma le agalelei o lo tatou Matai Sili.

E moni ai le saafi o le tama o Eperu o Tavita. “Lou agaga e, ia e faamanu atu i le Alii, o mea uma foi o i totonu ia te au, ia faamanuina Lona Suafa Paia”.

Ona ou oo atu lea i le Tafatolu o le Fefaatauagai o lo tatou Faigamalo. Tulouna lau Afioga i le Palemia ma le Aiga Kapeneta, tulouna lau Afioga i le Fofoga Fetalai ma sui usufono mamalu o le Palemene.

Tulouna lau Afioga i le Faamasino Sili ma sui usufono mamalu o alii ma tamaitai o le Faamasinoga a Samoa. Tulouna lava.

Ae le faaitiitia foi pe faagaloina e lenei itumalo le sa o le Talalelei i le aufaigaluega tofofi a le Atua o lo o tulivae i le ao ma le po aua se manuia o Samoa, malo tatalo.

E momoli foi le faafetai a lenei itumalo i Ofisa Sili o Pulega o Matagaluega a le Malo ma Faalapotopotoga Tumaoti. Ua faamalo le galulue. O le upu moni o lo outou paia ma lo outou mamalu o lo o lima ma vae i ai le tatou Faigamalo aua le faatinoina ma le sailiga o manuia mo Samoa. Ua faamalo tautua matavela i si o tatou atunuu. Ona ou faitau lea, o paia faale-Malo, o paia faale-Talalelei, ua malutau i paia ma mamalu faaleaganuu. Aua le afio o Aiga ma Tama o Tama foi ma Aiga, Usoga a Tumua ma Pule, Ituau ma Alataua, Aiga i le Tai ma le Vaa o Fonoti.

E le faagaloina foi le Faigamalo a Tutuila ma Manua, i le afio o lau Afioga i le Kovana Sili, le Lutena Kovana ma Maota e Lua. O le paia lava lea aua Sua ma le Vaifanua o Fofu ma Aitulagi Saole ma le Saleaamua ma le Launiu na Saelua. Le Ituau malosi ma le Alataua, ma le Laau na Amotasi, Tootoo o le Faleula ma upu ia te oe le Manuatele.

E i ai le taofi o Samoa mamana na, o paia faataotooto na o Samoa, e mamalu ai ana tu ma ana aganuu i totonu o le Maota lenei.

Lau Afioga i le Fofoga Fetalai, o le a agai se faamatalaga aua le talosagaina o ni mataupu i si o matou itumalo.

Lau Afioga i le Fofoga Fetalai, e auala atu i lau afioga le talosaga. Lau Afioga i le Minisita o Aoga, e i ai lava le talitonuga, a lelei se faavae o se tagata aemaise foi e faatusa i se fale, e faapena ona mautu se lumanai ma e umi foi se maota. O le ala lea o le talosagaina o lau afioga. O le itumalo lenei e 4 primary schools o lo o i ai, e leai se kolisi, ua na o primary schools e 4. O primary schools nei e 4, ua sailiili i ai foi se suesuega e atagia ai e le o lava faiaoga o lo o aoaoina ia alo ma fanau. Ia o le tatalo i lau Afioga, pe

maua ni isi faiaoga e fesoasoani i Primary School nei e 4 o lo o i totonu o lou itumalo. E 2 nuu e le o i ai ni Primary School, ae o le tatalo, ma le vaavaai i ai i tausaga ua mavae ma le faasolo mai i le tausaga lenei, matauina le toatele o fanau e drop out mai i aoga. O le faafitauli pito sili lava lea ona vaavaai i ai, ia e le o gafatia e fanau le oo atu i le isi stage o aoga po o kolisi. Afai foi e oo i kolisi, e le maea kolisi.

E le o ma iloa la, po o fea tonu o lo o i ai le faafitauli lea, po o matua? Ia po o faiaoga? Ia po o le tamaitiiti? Ae o lau lava vaavaai ma lau tilotilo, ia o le vasega tonu lea o lo o iai le faafitauli, o tamaiti tonu foi ia, o le a nofo atu i nuu, o i latou foi ia e fai ma sasa i nuu mo mea o faasalaga, ia ma faapena ona agai atu ai i Tanumalala.

Lau Afioga i le Fofoga Fetalai, ia aemaise lava ia vaega o aoga, ia o le tatalo, fea o i ai le tofa? Fea o i ai le moe? E tasi foi le isi vaega e faamauiina i lau vaavaai ma le tilotilo foi, ua faavaivaiina fanau i le mataupu lenei o le Matematika. E pei o le isi lea mataupu o lo o faapena ona matauina ua faavaivaiina ai tupulaga i lenei vaitau. Ia ou te le iloa pe o fea tonu e pau i ai, pe o faiaoga, ia pe o le silapasi a le Matagaluega o Aoga.

O le tatalo pe o fea o i ai le tofa, ia ae pe maua sina aoga foi lea e faa-technical college e fai i tua i nuu i tua, e agai i ai ia tupulaga nei, afai ua le ausia le academic achievement, ia ae se i faaoga i ai, aua e i ai lou talitonuga, ia e toatele lava i latou e iloa soosoo laupapa, e i ai foi taleni ma meaalofa a le Atua e foaiina i fanau, e faaoga i ai ia lo latou taumafai, ia ina ua o latou le ausia ia tulaga ia, e pei ona i ai ia talosaga tuuina atu.

Lau Afioga i le Minisita o le Soifua Maloloina, ia o le tatalo a lenei itumalo, e manaomia se falemai. O le 20 tausaga talu ai, sa i ai le falemai ma le fomai i tua i Fusi i Safata, peitai ane o fesuiaga lava a le faigamalo ua tuanai atu, ia o lea na toe aveese ai le falemai. A o Fusi Safata, sa centre i ai ia lena itu o le tatou motu i Upolu. Silasila lau afioga afai o lea sa i ai le falemai i le 20 tausaga talu ai, o lea ua tupu le tagata, ua tupu foi le faitau aofai i si o matou itumalo. A fua i ai, e tutusa lava lou alu i Poutasi e ave i ai lau mai, ia ma lou sau i inei i Apia e afa itula lava pe o le sili atu. O le tatalo lena i lau afioga i le Minisita o le Soifua Maloloina, fia maua se mapusaga e faapena ona mapu i ai le itumalo, aua pe a aafia i mai o le tino, ia maua foi se vaega e faatu ai, ia ma se vaega e faatau ai, ia pe tala ai foi vai, ae o lo o i ai ia fanua ua faaavanoaina mo lea faamoemoe pe a tau ane ai ia lou finagalo.

Lau Afioga i le Fofoga Fetalai auala atu i le afioga i le Minisita o Faatoaga. Faafetai tele i lau afioga i le Minisita o Faatoaga o lea ua matauina tele lava foi lau uunai i tulaga o tatou export sailia o maketi e faapena ona tuu atu i ai ia faaeleeleaga o si o tatou atunuu, ia e maua ai foi seleni ia aua le atinaeina o aiga ia ae faapea foi o nuu ma ekalesia.

O lenei itumalo o le 60% o tagata e faamoemoe i le eleele e ola ma soifua ai. E le gata e tausai ai aiga ae faapena foi ona maua ai seleni e faatino ai nisi o vaega. O le tatalo i lau afioga i le Minisita o Faatoaga, ia e tele lava ni isi

o aoaoga o faatino i inei po o Nuu ea lea e tele ona fai ai aoaoga mo mea o lea poloketi ma lea poloketi. O le tatalo lau afioga, pe le maua se avanoa e tufa atu i tua ia aoaoga nei e faigofie ai ona malamalama ia nai o tatou tagata i nuu i tua aua a fai atu e omai i Apia e manaomia foi le pasese e sau ai. Ae e tele ma anoanoai poloketi o lea e ta te vaai ia, o lea lava seivaga le tagata e sau i Apia e aoga ai ona faatoa maua lea o se malamalamaaga. Ae o le tatalo i lau afioga e tusa ai foi ma tulaga faapea ia maua se avanoa tutusa ma faifaatoaga i nuu i tua.

Ia o le isi mataupu lau afioga, o le tatou maketi o le nonu, o fea o i ai se maketi e faaalu ai lava le nonu i vaiaso uma ia po o masina uma. O le taimi nei ua pula faasoloatoa le nonu ia ua le iloa po o fea o i ai maketi o nonu ia ae na ona tatalo atu faapena i lau afioga, e tautuana ifo le nonu.

E i ai faafitauli o lo o feagai nei ma le aufaifaatoaga i si o matou itumalo, o le talo foi lea faafeusuai. O lea lava e tele talo ae e pei o lau matau atu i le faimaumaga soo, ua tele ina toe liu talo e tai pei la o le talo lea o le talo fusi. E faapena foi le talo lea salani. Ua toto toto, la ua tilotilo i ai matou nei o le aufaifaatoaga, ua liu le tiapula ua le toe maua le quality lea sa faafeusuai ai i le amataga. Ia na pei lea o se talo lea tulou le Maota, pei se talo vale. E na ona ola lautele ma ola tatupu, ia ae ua le lelei le aano e aumai e talo ia ma le faaaloalo lava.

O le vaega mulimuli o le talosaga i lau afioga i le Minisita, se i toe silasila ifo i tatou vailaau o lo o faaaogaina i tatou faatoaga. E i ai le faafitauli i lau matau o le vailaau lea o le 7 aso, e pei ua malosi tele. Ia e leai sou malamalamaaga i le vailaau ia ae na ona faapena atu i lau afioga, se i toe silasila ane, ua oo lava i isi meatoto ua pepe faasoloatoa atu ai i le vailaau lea o le 7 aso.

Ia ona ou oo mai lea i le Matagaluega o Galuega lau afioga i le Minisita o Galuega tauala atu i le Fofoga Fetalai, ia faafetai tele mo galuega faatino, ia aua foi ia si o matou itumalo. Ae na ona tatalo atu i lau afioga, e le i uma, e le i maea ia galuega ia sa faatino i lena tausaga. Ia o le tatalo ia faapena ona faaaauina galuega foi o auala o Tafitoala ia faapena foi Mulivai. Masalo e silafia e lau afioga le ford lena e i Mulivai, ua faasolo lava ina le mafai ona feoi taavale maualuga le suavai, seiloga lava e maualalo ia ona mafai lea ona sopoia. O le tatalo i lau afioga, ia pe le mafai ona toe faamaualuga, ae fai ai ni paipa i lalo ia faigofie ma aua ne i poloka ia femalagaiga a lo tatou atunuu.

O le talosaga lona lua, ia faafetai tele lava mo galuega sa fuafua mai lena faigamalo ia aemaise o le auala laupapa i Nuusuatia. O la ua mafai ona lua taavale e ofi ai. Ae e toe tasi lava le auala laupapa o totoe o Tafitoala. Lau afioga pe le mafai ona faalua taavale e faimalaga ai i le taimi e tasi aua e tasi lava le taavale e mafai ona alu ai. Ia ma o lalo ifo foi o le aualalaupapa lea lau afioga, ua matua mafafia lava le oneone o lo o iai pe le mafai ona sua e tau faaloloto. Aua o le aualalaupapa lea o lo o pipii ai foi ma le paipa a le

Malo o lo o sopoia le isi itu i le isi itu. So o se pa lava a le vai, e mautinoa lava e faaleagaina le paipa na e pipii agai i le aualalaupapa. Ia e leai sou malamalamaaga faainisia, ae lafo atu i lau afioga e te silasila iai e tusa ai foi ma ia vaega.

Ia ona ou ou mai lea i le Matagaluega o Fesootaiga lau afioga i le Minisita o Fesootaiga, e le tele lava, ua na o le vaega lea i a matou i Safata, o le vaivai ia o le initaneti i Safata lava ia. E te oo atu loa i ina i Mulivai faasolo atu agai i tua, ia e te fealualuai e sue se vaega foi lea e maua ai lau telefoni e te faaoga foi le initaneti. Ia o le tatalo i lau afioga tuu atu i ou autafa se i e silasila ifo i ai.

Lau afioga i le Minisita o MNRE, lau afioga i le Minisita, ia ou te iloa e tasi lea o itumalo e i ai le vaega o le peninsula lea e i tai i Safata mai i tua o Nuusuatia se i tau mai i Tafitoala, ia ou te talitonu e tasi lea o vaega o lo o i ai talafaasolopito a lo tatou atunuu, o le tama foi lea o Alo na folo e le i'a. Ia o i ina lea e i ai foi lea talatuu a si o tatou atunuu. O le matau, ua faasolo lava ina motu le vaega lea. Po o i ai se fuafuaga a lau afioga, ae fai se taligalu e tau taofiofi ia ma faapena foi ona avea ma vaega mataaga e faapena ona faatino ai nisi atinae ia po o ni faletalimalo, ia po o ni beach foi e faapena ona gasolo i ai atinaega o tagata tafafao mai fafo.

Ia, ua maea atu nisi vaega e pau lea le afioga i le Minisita o Tupe, e lagolagoina e lenei itumalo le tatou Tala i le Tupe, malo le faatoatoa malo le faasoa. Ia faasoa limalelei i nisi a tatou Tala o le Tupe i le lumanai.

Lau Afioaga i le Fofoga Fetalai, ou te manatu o le a faaii le lauga a lenei itumalo, ae se i fai lava sina tala i si ou itumalo o Safata. E silafia e le Maota o Safata o le aiga. O le Aiga Sa Tunumafono o le Aiga Malosi, aua le Afifio o le Falefa o Alo o Sa Tunumafono ma le latou Faauluuluga. Tainane Tapaau na tausi e le Alataua, Mamalu i le Taulauniu ma le Aitutagata, paia i le Alataua ma le Nofo a Tula ia Safata.

O le faalupeina lena o Safata i lona aotelega, ae peitai o lea ua vaeluaina Safata i le 1 ma le 2. O le 1 la o Safata, ia e mai Latatuli seia paia Lefagoalii. Safata 2 e mai i Nuusuatia seia paia Niualama. O le itumalo la o Safata 2, ia o Togamau ma ona tua. Safata 1, o Siulepa ma ona tua.

O le talosaga i le afioga i le Minisita e auala atu i lau afioga i le Fofoga Fetalai o lo o patino i ai ia vaega, ia e mamalu lava Safata ae vaeluaina ia Safata i Sisifo ma Safata i Sasae.

Ia o le a taoto ia le fiso ma ona lau o le a faapitoaugafa se leo i lou itumalo faapalota o Safata 2 po o Safata i Sasae aua le afioaga o Nuusuatia. O le paia lava lea aua le afio o le Saofetalai lau afioga Leituala, ia afifio foi Tuilimu ma Alaifata, tulou le Vaigafa lau fetalai Tupai aemaise Tapaulefano.

E le faagaloina le aufaigaluega tofofi a le Atua, Aiga Sa Levi o lo o faatunapaulia i totonu o Nuusuatialemanu, ia malo tatalo.

Ou te faamalo ma faafetai atu i le afioaga i Vaiee, aua le Afifio o Tama a le Fale, Tuia Afioaga Teo ma Tuia, Usoalii ma le Matua, Mamalu ia Safuiane Faleata, Sa Alo ma le Gataiala, ia ae faapea foi lau fetalaiga Lutuimagamau.

Faafetai i lau Susuga i le faifeau toeaina lau Susuga Kereta Fuafiva ma lou faletua. Faafetai tatalo, faafetai foi le fautua.

Ia, e le faagaloina foi lo matou falelua le afioaga o Fusi aua le Afifio o Alo o Sa Tunumafono, e faigata na faatogafau i ai le Alataua, tainane le mamalu i le Taulauniu ma le Aitutagata faapea le Alataua.

Faafetai faapitoa i lau Susuga i le Faatonu Toeaina o le Assembly of God, lau Susuga Taei ma le Faletua, malo tatalo. E le faagaloina foi le nofo a faafeagaiga i si o tatou nuu, malo le tatalo malo le faatoatoa.

E le faagaloina foi le faafetai i le afioaga o Tafitoala aua le afifio o Tama a le Falelua ma le Pitolua o le Aiga Sa Tunumafono. Afio Teo ma Mataia afifio e na alaala i Maota, afifio Usoalii, Alotutusa ma le Matua, mamalu ia Tupolata, Fagaisau ma le Alataua.

Faafetai lau Susuga Savelio ma le faletua ia Leu. Ia e ui lava ina oulua siitia i Salelesi, ae momoli atu le agaga faafetai aua tatalo.

E le faaitiitia foi le agaga e faafetaia si ou nuu o Mulivai, aua le Afio o le Faasalauta a Satunumafono lau Afioaga Leota. Afifio Mulitalo ia ae faapea foi Toalepai. Susu Usoalii ma le Matua, mamalu i le Taulauniu ma Le Alataua, ia faapea lau fetalaiga Manualetoalasi.

Faafetai i lau Afioaga Patele Losi, aemaise foi o Patele lagolago. Faafetai foi i le Tiakono ma lou faletua, ia malo tatalo. Ua malie le sua o le vai ma logoitino le pai mai o a outou tatalo o lenei ua aea ai lea manu ua ulu.

Ia, si ou nuu pele o Fausaga aua le afifio o Faauluuluga ma le Faasuaga, Susu Suafa, alaالاتا le Taulauniu ma le Aitutagata. Paia na le luua ma le mamalu i le Alataua.

Faamalo i lau Susuga Uatitagi ma le faletua, faapea foi lau Susuga i le Fesoasoani Sita ma le faletua. E leai se mea e faigata i le Alii. O lea ua tali mai ona o le mana o a outou tatalo. Ona ou faapea lea, le aupalota e afua mai i auauna o le Talalelei, o matai faletua ma tausii, saoa ma tamaitai, le malosi o le itumalo, tupulaga talavou ua aulia le 21 o lou itumalo o Safata 2, faafetai, faafetai i la outou filifiliga ma la outou pule ua toina mai e avea ai au e fai ma a outou auauna, e faaleo so outou finagalo i totonu o lenei Maota aua se manuia o le itumalo ma Samoa.

O lau faafetai faapitoa i lau komiti i tupu ma tamalii, le au tulatoa, faletua ma tausii, saoa ma tamaitai aemaise o le malosi o le komiti, malo le galulue, faafetai le loto onosai. E pei lava o upu masani, o lalo lava e saili ai malo.

Faafetai faapitoa i lou uso na ma tausinio, lau Tofa Nonu Teo Nomialagi Niumata Lose. E moni lava le tala a Fonoti e taaalo lava tama ae o le uso. Ia alofagia e le Atua lou soifua tului aua faiva ma tiute.

E le faagaloina lau faafetai i ou aiga uma i uso ma tuafafine i Samoa nei ia ae faapea foi atunuu e mamao. Faamalo tatalo, faafetai lo outou alolofa ma

agalelei e ala i la outou fesoasoani i so o se auala na taumafai ai lenei faamoemoe. O lau tatalo i le Atua, toe faatumu atu e le Atua i so o se auala tamaoaga ua toesea ona o lo outou sailimalo.

O lau faafetai mulimuli, ia o si ou toalua ma si au fanau. Ia malo le lototetele, lea ua tau lau o le faamoemoe, ia faapena ona i ai pea le agalelei o le Atua e foai atu le loto onosai aua le savaliga o lea faatoa amatatia i le galuega.

Lau afioga i le Fofoga Fetalai, o le a seu i fanua le leo o le tamaloa Safata. Ae i ai le talitonuga, e i ai lava taga a tautai ua sasi i le vasa. Ua le atoa ai le liu, o lea ou te faamalulu atu ai ma aoamalulu i puega, i se lape ua le taulauulu ma le tautamalii, ia faamagalo le vaivai. Manuia lau Afioga i le Fofoga Fetalai faapea le maualuga o le Maota aua le Fonousu a Samoa. Ia to mai i lagi faamanuiaga mo Samoa, ae ola lenei itumalo o Safata i Sasae, soifua.

Na faaalua le agaga fiafia o le Maota i le patipati o latou aao i le maea ai o le Saunoaga Faa-Taupou a le sui usufono mo Safata 2.

FOFOGA FETALAI: Ua faamalo le saunoa, malo foi le tofa i lau afioga i le sui usufono mamalu mai i Safata Nu.2. Ia malo foi saunoa faatamalii, ia aemaise foi o le faafetai faapitoa i si ou itumalo ia ona o lenei taimi muamua o lea ua e lauga ai i totonu o le Palemene.

Ia malo, ia o lea ua faafofoga foi ma le totoa ia le Afioga i le Palemia ma le Kapeneta ia aua foi manaoga o si ou itumalo. Ia malo faafetai, malo foi le toa i saunoaga, ia o lea lava ua maea le saunoaga i lenei Paeaiga, ia o mama na mo le alu i luma o le tatou fonotaga.

Ia o le taimi lenei, o lea e lava le taimi, ia mo se isi sui usufono e fia saunoa. Ia o le avanoa lenei ua tuuina atu, aemaise tatou o lea faatoa... ia lauga mua i totonu o le Maota. Ia o lea ua matau atu, o lea ua tulai mai se tasi foi o sui usufono matua foi... ua leva foi na i totonu o le Maota. Ia le sui usufono mamalu mai i Aana Alofi Nu.2, ia lau Afioga Aiono Tile Gafa. Ia atonu o lou avanoa lea e sausaunoa ai aua foi sou sao i le Tala Faatatau o le tatou Tala o le Tupe. Ia o le avanoa lenei o le sui usufono mamalu.

Afioga AIONO TILE Gafa (Aana Alofi 2): Faafetai tele i lau afioga i le Fofoga Fetalai mo le avanoa o lenei usugafono. Ae le i tuuina atu se sao o lenei itumalo e tusa ai ma le Tulafono Tau Faaofi o le Tala Faatatau Faaopopo o le Tupe pei ona taoto nei i luga o le Laulau a Fono a le Palemene, ou te muai faatulou i le paia o le Maota, ae a le maimoa faafofoga a Samoa aemaise o si ou itumalo.

“Lou agaga e, ia e faamanu atu i le Alii, o mea uma foi o i totonu ia te au, ia faamanu i Lona Suafa Paia. Lou Agaga e ia e faamanu atu i le Alii, aua foi ne i galo se mea e tasi o ana meaalofo”.

Lau Afioga i le Fofoga Fetalai ma le paia o le Maota, o le autu lena o le lauga a lenei itumalo. O le agaga e vivii ae i le Atua ona o Lona alofa tulituliloa ma Lona agalelei ia Samoa ma lenei Palemene.

E faatalofa atu ma le agaga faaaloalo i le paia o le Maota. Malo le soifua, malo le lagi e mama. Ua tatou sao mai i lena tausaga, ia manuia le Tausaga Fou.

Ou te muai faatulou aua le tapuaiga a lau Afioga i Le Ao Mamalu o Le Malo o Samoa, lau Afioga i le Tuiaana Tuimalealiifano Vaaletoa Sualauvi II ma lau Masiofo. E faatulou atu foi i le tapuaiga a lau Afioga i le Sui o le Fono a Sui Tofia, lau Afioga Le Mamea Ropati Mualia ma lou faletua.

Afio lau Afioga i le Faamasino Sili faapea lau Afioga i le Peresetene o le Faamasinoga o Fanua ma Suafa, alii ma tamaitai Faamasino ma le mamalu o le Faamasinoga a Samoa.

Afio lau Afioga i le Tamaitai Palemia, lau Afioga i le Sao Faapito, tainane lau Afioga i le Sui Palemia. O le mamalu ma le paia i a outou afioga i alii ma tamaitai Minisita o le Kapeneta. O le mamalu lava lea aua Ofisa Sili o Pulega ma le aufaigaluega o Matagaluega, Faalapotopotoga Tumaoti a le Malo.

Afio a outou afioga i Sui Minisita, Afio lau Afioga i le Taitai o le Itu Agai, afio lau Afioga i le Sui Taitai.

Afio lau Afioga i le Fofoga Fetalai o le Maota, lau Afioga i le Sui Fofoga Fetalai, o le mamalu maualuga aua sui usufono o le Palemene lona XVII o le Malo Tutoatasi o Samoa. O paia ia ma mamalu aua le tafatolu feafaatauagai o le tatou Faigamalo. Tulou, tulouna lava.

Ou te faatulou atu foi aua le tapuaiga ma le maimoa faafofoga mai a si o tatou atunuu. O le paia lava lea aua Tama ma o latou Aiga, o Aiga ma latou Tama, o le Usoga a Tumua ma Pule, Ituau ma Alataua, Aiga i le Tai ma le Vaa o Fonoti, tulouna lava.

E le vaea foi le falaooto i le paia aua le tapuaiga a nai o tatou uso tuaoi i Tutuila ma Manua, aua le faafofoga tapuai i le afio o lau Afioga i le Kovana Sili faapea le Kovana Lutena. Afioga lau Afioga i le Fofoga Fetalai, Peresetene ma le mamalu maualuga o sui o Maota e lua aemaise o tagatanuu uma o le Faigamalo a Tutuila ma Manua. O paia lava lea ia Sua ma le Vaifanua, o Fofu ma Aitulagi, Saole ma Saleaamua ma le Launiu Saelua. Tainane le paia i le Ituau ma le Faatuiolemotu, Tootoo o le Faleula ma Upu ia te oe le Manuatele, tulouna lava.

Ou te faatulou atu foi i le paia maualuga i Faauluuluga o Ekalesia i so o se fatafaitaulaga, tainane le mamalu o le aufaigaluega tofofi o le Talalelei, o lo o nonomanu aua se manuia o si o tatou atunuu ma lana Faigamalo.

Lau Afioga i le Fofoga Fetalai, o paia na ma mamalu sautuafafafa o Samoa, e amata mai i Malaetele na maape ai tofiga a le Tuimanua seia paia eleelesa o le Alataua, tulouna lava.

Lau Afioga e piiama le lagona ma le agaga i lenei taeao liugalua ina ua e saunia le tatou tapuaiga i le Atua. O le Atua o ala o manuia o so o se faamoemoe. Malo faafetai. E lagona foi le agaga faafetai ina ua e saunua e tuufaatasi o tatou agaga ma o tatou loto e faamaise ona o le valaau paia a le Atua i nisi o tama, o e sa mua i malae, sa togi le latou maa aua Samoa ma ona upufai. O le tautua ma le galuega e manatua pea.

Ou te faatulou i le tapuaiga a lo tatou atunuu. Ua uma ona matou faaleo se lagona, o Samoa o le ao mamala.

Lau Afioga i le Fofoga Fetalai, ana le seanoa le Atua tatou te le penei, tatou te le maua Lona matagofie i lenei taeao na liugalua ma lenei aso, lea ua tatou oaoa ai nei i Faleseu ae saa i maaomalie. E tafaimaa le tamaloa na liufatu i le Alataua, ae tafaitupu, tafaitamalii, tafaifaleupolu Tiafau, o le malae o le faautugatagi a Samoa. A saua foi au i le va e pei o le faiva i malae, pe fetogiai foi le tofa lalafo faasolituaoi, o le upu moni, o le gafa lava o le Tuiaana ua oo. I see lilia foi le gagana, e pei ona sa'i Asomualemalama a o alofisa ma Malietoa i le fale o le Tuamasaga. Ioe ina ne i sipa se lamaga, ona ou faapoipoi lilia lea ma ou faapea ane, tulouna ia lau faafofoga tapuai Samoa aua o oe lava o le aomamala.

Avea ia lenei avanoa ou te tulai ma le agaga faaaloalo i le tapuai mai a si ou itumalo. Peitai, e mua i se tala se lagona le sa avea ma Fofoga Fetalai le Afioga ia Leaupepe Faafisi, lea ua malolo manumalo, sa tautua ma auauna ai i totonu o le tatou Palemene i le tele o tausaga. E momoli atu le agaga faafetai i lau Afioga. Lau Afioga Leaupepe, o lau Afioga o le Tootoo o le Manino, e te afio i Tapulaaia ma paia o Satuala. O lou malo e le muimuaia aua lo outou Aiga Sa Leaupepe. Malo faafetai. O mea uma ma galuega lelei sa fesoasoani ai aua Samoa ma lona Palemene, lea ua e mapu atu e faaauau le tatou nuu ma le tatou Ekalesia. O le tatalo, ia saga faamanuia le Atua ma maua lou soifua laulelei, o le soifua ma le ola aoga, e auauna ai i so o se mea e finagalo ai le Atua.

Lau Afioga i le Fofoga Fetalai, e avatu foi le agaga faafetai aua le tapuaiga a si ou itumalo, le paia o le Aiga Satuala, o le Aiga Faalagilagi. Satuala, o le mavaega a Tuiaana Tamaalelagi, e te au i aiga, ae au lou tuafafine o Salamasina i le Tupu, ona o lona tina o le fuaimamao. O oe o le alii o aiga, o le tama a tause, e te faalagilagi i upu o Samoa. Aiono ma Leaupepe, Sua ma Toleafoa ma le Taauso, le mamalu i le Falefitu ma lau Tofa i le Tuua, faapea lau Tofa i le Igoamatua ia Tauauvea, malo faafetai, malo topule, ua e tapule ua e tofa, ua e finagalo malie, ua e tusiaao i lou nei faatauvaa aua se sao o le tatou itumalo aua ona upufai i le Palemene o Samoa.

E le faagaloina le itupa paia aua faletua ma tausii, saoa, Sa Fuatino ma Aliitasi, alo o le Tuua, alo o Aiga, alo o le Falefitu, alo o Tauau, o le malosi o le tatou nuu se i oo lava i alo ma fanau, viia le Atua. Ua outou tofi tofa e ala i lo outou finagalo faale-Atua, a lea ua outou tatala le faitotoa o le Palemene e ulufale ai Aiono? O le sao lea o le tatou itumalo. Malo faafetai.

E le faagaloina nai a tatou faafeagaiga taulagi a le tatou nuu, i la outou tatalo i le po ma le ao aua se manuia o le tatou nuu, aua le galuega a le Atua, ni agaga se tele mo le Atua ma lona Malo. Nai ou matua faaleagaga ia Uta ma Feula, se malo faafetai. Malo le faalototele, malo le fautua mai.

Faafetai le agalelei. Lau Susuga i le Tiakono Katoliko Aiva ma le faletua, malo faafetai i galuega i le tauatiae.

Lau Susuga i le tausī Matagaluega Feli ma le faletua ia Aga, ia malo galulue, faafetai mo le galuega a le Atua, aemaise o le lagolagosua i le atiaaina o le feau ma le galuega a le Atua i totonu o le tatou nuu.

Lau Susuga i le Epikopo o le Ekalesia Mamona, le Au Paia o Iesu Keriso o Aso e Gata ai, lau Susuga Opeloge ma le faletua, faapea lau Susuga i le Epikopo i le Ekalesia i Lepale.

Le tatou Ekalesia AOG lau Afioga Tupuivao ma lou faletua, lau Susuga Farani ma le faletua, lau Susuga Vaalele ma le faletua, lau Susuga Keilani ma le faletua.

Le Ekalesia Aso Fitu o le toe Afio Mai, lau Susuga Iosefo Lolesio ma le faletua, lau Susuga Paulo ma le faletua i le Ekalesia Patipati i Lepale, aemaise lau Susuga i le Faafeagaiga o le EFKS i Lepale, lau Susuga Peteru ma le faletua. Viia le Atua, malo le galulue. Faafetai i le galuega e le faigofie, le tauasuina o le ipuvai o le ola aua Fasitoouta mo le lumanai. Maua ni agaga aua le Atua ma Lona Malo. O le tatalo, ia faamanuia le Atua ia te outou, ia maua lo outou soifua laulelei, faatumu e le Atua la outou utu faaleagaga e faatamaoagaina ai outou i Lana feau ma Lana galuega.

E avea foi lenei avanoa lau Afioga i le Fofoga Fetalai, leaga e le galo i le loto fita ma faigata sa tauasa mai, e le o po se lilo i le tausailiga o se tofi o lenei itumalo. E momoli atu ai le agaga faafetai i nai uso ma nai tuafafine sa matou taufetuli mai, matou tauva mai i lenei faamoemoe, lau Susuga i le Suafa, Susuga i le Laau na Fausia Aiono Afaese Toleafoa, lau Afioga a le Taauso Lolomatauama Eseta, lau Tofa Apenamoemanatunatu, lau Tofa Faletutulu Meti. Malo le tau, malo le onosai, e le faigofie, ioe. A o le upu masani, e toatele lava e finau ae toatasi lava e filifili e le Atua. Tatou te le iloa Lona finagalo. E oge auala le tagata, a o auala a le Atua, leaga o outou finagalo ma o tatou loto, e le o le finagalo lea o le Atua. O tatou ala, e le o ala ia o le Alii. Fai mai Isaia, “E pei ona maualuga o le lagi i le lalolagi, e faapena ona maualuga o ou manatu i outou manatu ma ou ala e sili ona maualuga i o outou ala. Viia le Atua, ia saga faaaogaina lo outou soifua i feau ma ni galuega e aoga ai. E le gata i totonu o le tatou nuu, totonu o Ekalesia, aemaise o le Malo. Ia faamanuia le Atua.

Lau Afioga i le Fofoga Fetalai, e le tele ni manaoga o lenei itumalo, ae na o ni manaoga faamanatu ma le agaga faafetai ma le tuualalo aua le faigamalo o lo o tulai mai nei aua le taitaiga o Samoa. Lau Afioga i le Minisita mo le Siosiomaga, e talii lava ae popoe i se tulai ma se leo, e moni lava o oe lava o sulī o Tuimavave, o oe lava o sulī o le Tuiaana lau Afioga vaeatu ou paia

ma ou mamalu. O lena ua taoto atu i lau Afioga se talosaga vaivai a lenei itumalo, na ma oo atu ma le Susuga i le Faafeagaiga, e tatalo i lau Afioga, ona o tua o le matou hall pei ona faimalaga atu i lena itu o le maota, ua matua utia lava i le sami ma le galu. Toetoe lava ina faaletonu, na o laau la e, vaeatu le Maota ma le Fono a le atunuu, o la e tau taofiofi ai. Ioe. O lea ua maua i luma lou finagalo, ae na ona faamanatu atu i lau faasoa utiuti ma lau faasoa le lava, sau se aso a o se taimi, ia, e te asiasi atu se i e matua silasila ma e matau ona fai lea i ai o lau faatofalaiga. O lea e mafaufau, o lea e sauni le matou galuega o le faafouina ma le tuuina i lalo o le matou malumalu, e toe fia fausia sa matou galuega fou. O le faamoemoe o le matou Ekalesia ma le susuga i le faifeau, e matou te mei i tai i le hall e fai ai a matou lotu ma matou tapuaiga, a o le popolega lea. O le popolega lea i lau Afioga, na ona fesoasoani atu, ae taoto atu i ina i lau faasoa.

O i i le matou pitonuu lau Afioga o lo o i ai le faataufusi i totonu i ou tuafale. O lea ua tatou i ai i le vaitau o le suiga o le tau ma le maaleale o lenei vaitaimi. O le sau mai uta lau Afioga, e tifa le sau i lalo. O le suavai uma lava e sau i uta, e tofu uma lava i totonu o le taufusi lea. O le uiga o se manatu, a oo ina to timuga pe lua aso i le tolu aso, ua le toe mafai e nai aiga ia e i autafa ona talitali le maemaea o le vai. Talofa i le soifua maloloina. Talofa i le mafatia o aiga. Ia, leaga o tulaga tau lau Afioga, o le siosiomaga, ae lafo atu, pe mafai ona fai sina alavai, a tulai mai tulaga faapea, ia ona faapena lea ona fetafeai le vai. Ae tatalo atu i lau Afioga mo se avanoa e te silasila i ai.

Lau Afioga i le Minisita o Aoga, malo faafetai, o oe o le Tama Aana, lau Afioga Vaeatu. Ia, o lena ua taoto atu le talosaga e pei ona fesootei atu le matou Pule Aoga, e manaomia lava sina photocopy foi lea, masini mo le matou Aoga Tulaga Lua. Ioe. O lea ua maua ina ua e saunoa mai ia te au i le taeao lenei, viia le Atua, faafetai i le tofa o lena ua e maua le tusi ma o lena foi ua e galue ai. Ia, o lea o le a ae aoga, talosia ia ae aoga ua tu le masini i o i Fasitouta. Malo faafetai.

O le isi tulaga lau Afioga i le Minisita, e le o lava a matou faiaoga. E le o lava a matou faiaoga. O le talosaga lena. E faalogo atu foi i le taeao i saunoaga ma finagalo o nisi sui usufono, ia o le faafitauli lava lea e tasi. Ae ou te talitonu o lena e i ina le faasoa, o lena e i ina le tofa liuliu aua le amataga o lenei tausaga aua aoga a le fanau. Ia e alofagia nai faiaoga pe toatolu, ona fesoasoani lea i le matou Primary School.

O le faaiuga o le masina nei lau Afioga i le Fofoga Fetalai, e tatala ai le matou potu, o le potu lea ua faamoemoe e fai ai suesuega a tamaiti. O lo o ua i ai i totonu a matou computers e lua. O le galuega lea, o le galuega na lotu faatasi i ai nisi o alo ma fanau a lo matou nuu sa aoga ai i totonu o le faleaoga lea, o le matou aoga. Lea ua malilie e fai le latou fesoasoani lea, le latou tautua ina ia tapena le potu lea aua alo ma fanau a lenei nuu.

Lau Afioga i le Minisita o Fesootaiga, ia ou te iloa e tutusa lava lau tala sa fai atu i le Afioga i le Minisita o le Siosiomaga ma lau Afioga, e le o oulua o nisi. E talitonu foi o le aoga lea sa amata ai lau Afioga i le Minisita o Fesootaiga. Ae ua ou talosaga atu ma le faaaloalo i lenei vaitau ua maualuga le tulaga o aoga, ua tele le fesuaiga, a o lea lava e malamalama le tatou Maota, ia, o i lava i le aoga lea na tutupu mai ai le toatele o le au atamamai. Lau Afioga i le Minisita, ia pe maua ai ma nai isi masini computers e fesoasoani ai i le... lea o le a tatala leaga e le mafai ona nofo le mea e tatau ona fai. A o le gasologa ia ma le finau i isi mea, e tuualalo atu. E tatalo atu, ioe. E fai ae le aoga ma le vaitaimi lea o le faaiuga o lenei masina, maua se fesoasoani aua ia meafaigaluega, ia, faamolemole. E tatalo atu ma le agaga faaaloalo i lau Afioga.

FOFOGA FETALAI: Ia, i le ava tele ou te vaelupeina ai le saunoaga matagofie a le Afioga i le sui usufono mamalu. Ou te talitonu lava e tele lau tapenaga ae manatu foi i le tatou taimi.

Talu ai o lea ua tatou taunuu i le taimi e manava ai le tatou galuega o lenei aso, ia o le a maua pea avanoa e faaauau ai saunoaga i le aso a taeao pe a momoli atu i ai le soifua ma lo tatou malosi.

Ia, e le faaititia le agaga faafetai o le Nofoa pe a matau atu i lenei aso ma tatou taualumaga. E momoli atu le faamalo ma le faafetai i lo outou tausi mamalu aua le Palemene ma ona tulaga aloaia. Faamalo le onosai ua toafilemu ma ua matagofie ai a tatou taualumaga i lenei aso.

E momoli atu foi le faafetai i sui usufono sa sausaunoa aemaise o saunoaga mua i Afioga i sui usufono mamalu o nisi o itumalo. Faamalo tapena, ma ua faafetai manatu i le tapuai mai a outou itumalo. E pei ona molimauina ua tuu avanoa lava le Maota mo a outou saunoaga mua. O le agaga fiafia lea i le matau atu a le Fofoga Fetalai, e ese le mamalu o tatou faiga faa-matai o lo o tausi ai le mamalu o le tatou aganuu e mamalu ai foi le Palemene. Malo le usufono.

Samoa i ou tulaga faalupelupeina, faamalo le tapuai i lenei aso. Ua tau i manu le galuega sa alo i ai lau Palemene. Malo faafetai. Faamagalalo se upu a o se gagana ua sopoutu a lau Palemene. Ia alofagia e le Atua toega o galuega o lenei aso.

Faafetai foi i le tapuaiga a Ofisa Sili o Pulega o Matagaluega ma Faalapotopotoga Tumaoti a le Malo, faamalo onosai. Faafetai i auaunaga uma o lo o tautua faaauau a o alofaiva lau Palemene.

Ae tatou te le i tolopo, ou te talosaga atu i lau Afioga i le Sui Fofoga Fetalai e te saunia se tatalo e faaiu ai le tatou fonotaga i lenei aso.

Na tolopo Taulumaga a le Fono Aoaofaitulafono i le itula e 1:06 i le afiafi seia aulia le itula e 9:30 i le taeao o le Aso Lulu, 19 Ianuari 2022.